

Nihánj me 'o yanj cartá qui'yaj yo'o so' ca'néé so' rihaan nij yuvii israelitá noco' man Diose a

Nana nihánj taj xna'anj se
vaa sa' uxrá vaa ta'níí Diose
síí cu'naj Jesucristó a

1 Nata' uxrá Diose se-nana Diose
rihaan nij síí nata' se-nana
Diose gaa naá, ne nata' nij so' nana
yo' rihaan xii ní' nij síí cumán gaa
naá a. Dan me se do' do' cataj
xna'anj Diose se-nana so' rihaan nij
síí nata' yo', ne ino vaa qui'yaj Diose
ga 'o 'o nij so', gaa cataj xna'anj
Diose se-nana Diose rihaan 'o 'o
nij so' a. ²Tzaj ne yaj gaa nichrun'
ca'anj ni'ya chumii nihánj me se
cataj xna'anj ma'an ya ta'níí Diose
se-nana Diose rihaan ní', qui'yaj
Diose, ne ta'níí Diose me se so' me
síí cune' Diose man se vaa guun
chij so' rihaan cunudanj rasuun
vaa güii, ne so' me síí qui'yaj
cunudanj chumii, qui'yaj Diose ei.
³Ne ase vaa ma'an Diose ro', danj
vaa so' chuguanj. Dan me se ni'yaj
ní' man so', ne xcaj ní' cuentá se
vaa ve'é ndo'o vaa Diose, ne xcaj ya
ní' cuentá daj vaa ma'an Diose ei.
Ne che'é se sij nucuaj ndo'o me
so' ro', che'é dan maan nana avii

uun tu'va so', ne 'o mán chre' nu'
rasuun, ne se quiri' a 'o rasuun
qui'yaj so' ma'. Che'é dan tinavij
so' cacun' tumé ní', gaa ne ca'anj
cayáán so' rej xta' ndo'o rej x'nuj
Diose, ne rej nuva' Diose yáán so'
cuano ei. ⁴Dan me se guun so' síí
sa' doj rihaan nij se-mozó Diose,
ne nocoo uxrá doj vaa suun atá so'
rihaan suun atá taran' nij se-mozó
Diose nanj chuguanj. ⁵Q se aj ne'en
soj nana nihánj nana ca'mii Diose
che'é ta'níí so' a:

—Ta'níj mé so' á. Cuanó nihánj
me se quene'en yuvii se vaa ta'níj
mé so', qui'yáj a. —Danj ca'mii
Diose che'é ta'níí Diose, tzaj ne
nuveé rihaan se-mozó Diose ca'mii
Diose nana vaa danj ma'.

Ne nihánj me nana ca'mii Diose
che'é ta'níí Diose, cataj Diose:

—Guún 'unj rej so', ne guun so'
ta'níj a —cataj uún Diose che'é
ta'níí Diose a. Tzaj ne ne ca'mii
so' nana vaa danj che'é se-mozó
so' ma'. Maan che'é ta'níí so' ca'mii
so' nana yo' adonj.

⁶Dan me se so' me síí guun síí
chava' rihaan taran' ní' sij noco'

man Diose a. Ne danj Diose taj se vaa asa' ca'na' uún so' rej cuman taran' nij yuvii gaa i'na' rihaan chumii nihánj qui'yaj Diose, ne quina'vij taran' nij se-mozó Diose rihaan so', taj danj Diose a.

⁷Ne a'mii uún danj Diose che'é nij se-mozó Diose, taj yo' se vaa nana uun do', nda' rá se vaa daa ya'an do', vaa se-mozó Diose, qui'yaj Diose a.

⁸Tzaj ne vaa doj nana nó rihaan danj Diose nana a'mii rihaan ma'an ta'ní Diose, ne nana yo' taj: “Diose mé so', ne quirii ta'ngá' so' nu' cavii nu' ca'anj, ne nica gaa rá so' nica yu'unj so' man yuvii nu' cavii nu' ca'anj a. ⁹Niha' inanj rá so' canocó' so' chrej sa', tzaj ne nachri' uxrá so' chrej chi'ii ei. Che'é dan Diose síi uun chij rihaan so' ro', cune' so' mán so', se vaa cavii sa' so' doj rihaan nij tuví' so' a”, taj danj Diose a.

¹⁰Ne taj uún danj Diose: “Asij guun che'e chumii nihánj, ne so' me síi cune' man chumii nihánj, Señor. Ne ma'án so' ra'a yá so' qui'yáa so' nu' se man rej xtá' adonj. ¹¹Ne vaa güii, ne quinavij nu' nihánj, tzaj ne daj chihaa míf se quinaví so' ma'. Dan me se ase vaa yatzíj nga ro', danj gaa nu' chumii nihánj do', nu' rej xtá' do' ei. ¹²Ne ase vaa yatzíj ro', danj gaa narumii so' man roj yo', ne guun ino roj yo', qui'yáa so' ei. Tzaj ne se cunuu ino ma'án so' ma'. 'O veé danj gaa so', ne daj chihaa míf se caví' so' man chuguanj”, taj uún danj Diose che'é ma'an ta'ní Diose a.

¹³Ne ca'mii uún Diose rihaan ta'ní Diose, cataj so':

—Cayáán so' rej x'núu 'unj rej nuva' 'unj, ne qui'yaj canaán 'unj rihaan nij síi taj ri'yunj mán so', ne quirii ta'ngá' so' rihaan nij so' a —cataj Diose rihaan ta'ní Diose a. Tzaj ne a 'ó rihaan se-mozó so' ne ca'mii so' danj ma'.

¹⁴Dan me se xa' nij se-mozó Diose, tzaj ne nana uun me nij so' a. 'Yaj suun nij so' rihaan Diose, ne ca'née Diose man nij so' qui'yaj suun nij so' rihaan ní' sij cavii sa' ga Diose nu' cavii nu' ca'anj ei. Ne sa' doj vaa ta'ní Diose rihaan nij se-mozó Diose nanj chuguanj.

Nana nihánj taj xna'anj se vaa no xcúun uxrá ní' cunó ní' se-nana Jesucristó a

2 Che'é dan doj a nó xcúun ní' cunó sa' ní' nana aj nari' ní' ei. Sese se qui'yaj ní' danj, ne do' do' tanáj ní' chrej sa' yo', ne quini' ní' xrej Diose, ne ca'anj ni'ya ní' gaa nanj chuguanj. ²O se ya uxrá vaa se-nana Diose nana cataj xna'anj nij se-mozó Diose rihaan síi cu'naj Moisés gaa naá ei. Tzaj ne nij yuvii me se ne cunó nij so' nana yo' ma'. Tzaj ne nica ya qui'yaj Diose sayuun man 'o 'o nij yuvii ne cunó nana yo' chuguanj. ³Che'é dan, asa' ca'vee quinani' ma'an ní' rihaan sayuun, sese se xcaj sa' ní' cuentá che'é chrej sa' chrej qui'yaj naca Diose quinani' ní' rihaan sayuun, rá soj ga. Dan me se asino ma'an síi 'nij ra'a man ní' me síi cuchruj chrej sa' yo', gaa ne nij síi cunó nana ca'mii so' ro', cataj xna'anj nij so' se-nana so' nana sa' yo' rihaan ní', ne nari' sa' ní' nana yo', qui'yaj nij so' ei. ⁴Ne qui'yaj ndo'o ma'an Diose

suun sa' nocoo ni'yaj yuvii, ne rque ndo'o so' Nimán so' cunuû nimán yuvii adonj. Danj inanj guun rá Diose qui'yaj Diose, che'é se guun rá so' cunoo ní' se-nana síi 'nij ra'a man ní' yo' ei.

Nana nihánj taj xna'anj che'é nu' se vaa quiran' Jesucristó che'é ní' a

⁵Dan me se cataj xna'anj 'unj rihaan soj che'é güii guun chij Diose rihaan chumii nihánj a. Ne ne cune' Diose man nij se-mozó Diose se vaa quirii ta'nga' nij so' rihaan chumii nihánj ma'. ⁶Maan se vaa nana no rihaan danj Diose nana ca'mii yo'o so' rihaan Diose, ne cataj so' se vaa: "Taj yu'vee nó a doj yuvii ma'. Me che'é nuû uxrá rá so' man yuvii ga. Taj yu'vee nó a 'ó ta'níi yuvii ma'. Me che'é nuu 'ee rá so' man nij so' ga. ⁷Tzaj ne sij nocoo' doj tzin' me nij yuvii rihaan nij se-mozó so', qui'yáa so' chuguanj. Gaa ne ve'é uxrá cavii sa' nij yuvii, ne ve'é uxrá ca'mii nii che'é nij yuvii, qui'yáa so' asanj. ⁸Ne quirii ta'nga' nij yuvii rihaan cunudanj rasuun, qui'yáa so' uún asanj", taj nana no rihaan danj Diose yo' a. Ne dan me se ya quirii ta'nga' nij yuvii rihaan cunudanj rasuun adonj. Tzaj ne ne'en ní' se vaa yaj me se ataa quirii ta'nga' nij yuvii rihaan cunudanj rasuun a. ⁹Tzaj ne ni'yaj ní' man Jesucristó, ne nda' se ya ya sij nocoo' doj guun so' rihaan nij se-mozó Diose rque doj yo', tzaj ne yaj me se aj guun chij ndo'o so', ne ve'é ndo'o a'mii nii che'é so', qui'yaj Diose a. Ne danj cavii sa' so', che'é se cavi' so' a. 'O se sese ne cavi' so', ne ne ca'vee

nayon so' rihaan cunudanj ní' a ma'. Tzaj ne yaj me se qui'yaj ndo'o Diose se luj che'é ní' se vaa nayón Jesucristó rihaan ní' nanj adonj.

¹⁰Dan me se Diose me síi qui'yaj nu' rasuun che'é ma'an inanj so' chuguanj. Dan me se vaa güii, ne nucu' ndo'o nij ta'níi Diose rihaan Diose rej xta', qui'yaj Diose, ne Jesucristó me síi narqué chrej sa' canoco' nij ta'níi Diose, ne quinanii nij so' rihaan sayuun, ne cavii sa' nij so' chuguanj. Che'é dan vaa che'é quiran' Jesucristó sayuun rihaan yo'óo nihánj qui'yaj Diose, ne maan che'é se quiran' Jesucristó sayuun ro', ne che'é dan me guun chij ndo'o so' ne ne achiin cavii sa' nu' so', qui'yaj Diose nanj ei. ¹¹Dan me se ta'nij Diose me Jesucristó, ne ta'nij Diose me ní' yuvii cunuu sa' rihaan Diose che'é Jesucristó, ne che'é dan ne guun na'aj Jesucristó cataj so' se vaa tinúu so' do', ra'vij so' do', me ní' ma'. ¹²Dan me se cataj so': "Nata' 'unj rihaan nij tinúj che'é so', ne ve'é cachraj chra' che'é so' asa' cunuu chre' núj rihaan so' a", cataj so', ca'mii so' nana no rihaan danj Diose a. ¹³Ne ca'mii uún so', cataj so': "Gaa nucuaj raj ni'yaj 'unj man Diose adonj", taj so' a. Ne guun che'e uún so', cataj so': "Ni'yaj soj manj ga nij ta'níi Diose síi rque Diose manj vij", taj uún Jesucristó a. Dan me se nu' nana nihánj me nana ca'mii Jesucristó che'é ní' sij tinúu Jesucristó do', ra'vij Jesucristó do', nana no rihaan danj Diose adonj. ¹⁴Dan me se che'é se vaa nee vaa cúu vaa ton vaa man ní' sij ta'níi Diose ro', che'é dan ase vaa ma'an

ní' ro', danj gaa guee Jesucristó, ne ca'na' so', ne cavi' so' a. Ne gaa cavi' so' me se qui'yaj canaán so' rihaan sí 'yaj avi' ní' a. Dan me se sí' chree me sí 'yaj avi' ní', ne Jesucristó me sí' ca'vee qui'yaj canaán che'é yan cavi' so' ei. ¹⁵Ne guun nucuaj so' nacaj so' man ní' sij chéé rihaan cacun', ne gaa rque me se ndaa chéé chu'vi' cavi' rma'an ní' che'é se inanj cacun' qui'yaj ní' chuguanj. Tzaj ne che'é se vaa cavi' Jesucristó che'é ní', che'é dan güéj sayuun yo' xráá ní' ne sí' chéé ma'an me ní' ei. ¹⁶'O se ne ca'na' Jesucristó tinanii so' man nij se-mozó Diose rihaan sayuun ma'. Maan se ca'na' so' tinanii so' man ní' ta'nij ta'nij si'no sí' cu'naj Abraham sí' cane gaa naá rihaan sayuun adonj. ¹⁷Che'é dan me naqui'yaj so' man so', ne nda' rá se vaa guee nij tinúu ya so' ro', vaa so' adonj. Danj qui'yaj so' che'é rej ca'vee cunu 'ee rá so' man ní', ne guun so' xrej atá suun nocoo doj rihaan Diose che'é ní', ne guun nucuaj rá ní' ni'yaj ní' man so', ne tinavij so' cacun' tumé ní' sij nocoo man Diose adonj. ¹⁸'O se che'é se quiran' ma'an ya so' sayuun se vaa guun rá sí' chree caxrii sí' chree chrej chi'ii rque so' ro', che'é dan guun nucuaj so' racuíj so' man ní' asa' guun rá sí' chree caxrii sí' chree chrej chi'ii rque ma'an ní' adonj.

Nana nihánj taj xna'anj se vaa sa' doj vaa Jesucristó rihaan sí' cu'naj Moisés sí' cane gaa naá a

3 Dan me se sij sa' me soj rihaan Diose, tinuj, nocoj. Ne nacúun

Diose sí' nicun' xta' man soj se vaa cavi' sa' soj ga so' adonj. Che'é dan xcaj soj cuentá che'é Jesucristó, ne sij ca'née Diose rihaan ní' me so', ne cataj xna'anj so' rihaan ní' nana ya che'é Diose, ne ase vaa xrej atá suun nocoo doj vaa uún so', tinavij ya so' cacun' tumé ní' rihaan Diose ei. Inanj danj vaa nana nocoo ní' nanj ei. ²Ne ve'é 'yaj suun Jesucristó nu' suun ca'ne' Diose rihaan so', nda' rá se vaa ve'é qui'yaj suun sí' cu'naj Moisés nu' suun ca'ne' Diose rihaan so' qui'yaj suun so' che'é nij yuvii nocoo man Diose adonj. ³Dan me se xcaj sa' ní' cuentá che'é Jesucristó ei. 'O se sa' uxrá doj vaa so' rihaan sí' cu'naj Moisés yo' nanj chuguanj. Dan me se ne'en soj se vaa doj yu'vee nó sí' cune' ve' rihaan ma'an ve' yo' ei. Ne ase vaa sí' cune' ve' vaa Jesucristó, ne cavii sa' taran' ní' ga Diose, qui'yaj so', ne ase vaa ve' yo' vaa ní' do', vaa sí' cu'naj Moisés do', nanj ei. ⁴Dan me se vaa 'o ya mij sí' 'yaj daj a nij ve' ei. Tzaj ne orún' Diose me sí' qui'yaj daj a rasuun nanj ei. ⁵Ne sí' cu'naj Moisés me se ve'é ya qui'yaj suun so' nu' suun ca'ne' Diose rihaan so' adonj. Tzaj ne nanj mozó me so' rihaan nij yuvii narii Diose, ne cataj xna'anj so' rihaan nij yuvii che'é nij nana nata' Diose rihaan nij yuvii rej rihaan nij yuvii adonj. ⁶Tzaj ne Jesucristó me se nuveé mozó me so' ma'. Tananj ta'níi sí' tucua ya ve' me so' ei. Ne veé danj 'yaj suun so' nu' suun vaa rihaan so' rá ve', ne dan me se ma'an ya ní' me ve' yo', sese yo'oo guun ya rá ní' se vaa cavi' sa' ní', qui'yaj Diose, ne sese guun

nihá' rá ní' cataj xna'anj ní' rihaan tuvi' ní', ne sese se cuchu'vi' ní' canoco' ní' man Diose ei.

Nana nihánj taj xna'anj se vaa se gaa nichraj nimán ní' ni'yaj ní' Diose a

⁷Che'é dan cunō ní' nana nihánj nana ca'mii Nimán Diose á: “Cuan' ro', sese ya cuno soj nana ca'mii Diose, ⁸ne se naquiyaj nichraj soj nimán soj ndaa rá se vaa quiyaj nij sí cumán gaa naá gaa cachéé nij so' rej tacaan a. Dan me se cunu' nij so' ga Diose, ne guun rá nij so' xcaj nij so' cuentá sese ya quiyaj Diose sayuun man nij so' a. ⁹Veé danj quiyaj xii soj nij sí cumán gaa naá rihaan Diose, ne quene'en nij so' nu' nij suun sa' nocoo quiyaj suun 'unj che'é nij so' ¹⁰vij chihaa ya yo' a. Che'é dan ca'maan raj ni'yaj 'unj man nij so', ne cataj 'unj se vaa ne ne'en uxrá nij so' a ma'. ¹¹Q se ne quene'en uxrá nij so' daj quiyaj nij so' canoco' nij so' manj a ma'. ¹²Dan me se ca'maan raj, ne guun ya raj daj quirán' nij so', ne yo'o cataj 'unj se vaa daj chihaa mij se quinaránj ya rá nij so' ga 'unj a man chuguanj”, taj nana ca'mii Nimán Diose a.

¹²Dan me se cutumé uxrá soj man soj se gaa nanj gaa quij nimán yo'o tuvi' soj cataj so' se vaa taj vaj Diose, man tinuj, man nocej. Dan me se se gaa nanj tanáj xco yo'o tuvi' soj man Diose sí vaa i'na' ya ma'. ¹³Cuanō nihánj me se nago' soj chrej nucuaj man tinúú soj daj a güii gaa vaa ya'núj rihaan soj ei. Danj quiyaj soj, se gaa nanj guun nichraj rá tinúú soj quiyaj nana ne chi'ii a. ¹⁴Q se

yaj me se guun ní' sí cavii sa' ga Jesucristó, ne cavii sa' ya ní' ga so' sese yo'o cuchuman rá ní' cunō ní' nana ya, ndaa vaa quiyaj ní' gaa guun che'e ní' canoco' ní' man Jesucristó chuguanj.

¹⁵Dan me se danj Diose taj: “Cuan' ro', sese ya cuno soj nana ca'mii Diose, ne se naquiyaj nichraj soj nimán soj ndaa' rá se vaa quiyaj nij sí cumán gaa naá a. Dan me se cunu' nij so' ga Diose a”, taj danj Diose a. ¹⁶Ne me sí ne ca'vej rá cunō se-nana Diose, ne cunu' nij so' ga Diose, rá soj ga. Ne taran' nij sí cavii Egiptó ga sí cu'naj Moisés me nij so' chuguanj. Veé ya nij so' ei. ¹⁷Ne me sí me ca'maan rá Diose ni'yaj Diose rque vij chihaa ya yo', rá soj ga. Ne sij ca'maan rá Diose ni'yaj Diose me nij sí quiyaj cacun', ne cavi' nij so' rihaan yo'óo tacaan a. ¹⁸Ne me rihaan nij sí cataj Diose se vaa daj chihaa mij se cachén nij so' naraan rá nij so' ga Diose, rá soj ga. Rihaan nij sí ne ca'vej rá cunō rihaan so' me yo' na'. Veé ya nij so' ei. ¹⁹Ne ne'en ní' se vaa che'é se ne cuchuman rá nij so' ni'yaj nij so' man Diose ro', che'é dan ne guun nucuaj nij so' quinaraan rá nij so' ga Diose chuguanj.

4 Che'é dan cutumé uxrá ní' man ní' ei. Tadó ní' se gaa nanj caráán ní' xréé ní' rihaan nana cataj xna'anj Diose rihaan ní' se vaa catuu ní' chrej ca'anj ní' naraan rá ní' ga Diose á. 'Q se adi' se vaa sí ne ruvi' rihaan ro', gaa ní', sese se cutumé ní' man ní' adonj. ²Ne ase vaa catúj se-nana Diose xréé nij sí cumán gaa naá ro', danj vaa guee

catúj se-nana Dioso xréé ma'an ní' cuano ei. Gaa cuno nij so' se-nana Dioso me se cuno uun nij so' nana yo', ne taj se gún' nana yo' rihaan nij so' a ma'. Dan me se nata' nii nana yo' rihaan nij so', tzaj ne ne cuchuman rá nij so' daj chihaa mǐj nana yo' a man chuguanj. ³O se orún' ní' sij amán rá nilyaj man Dioso me nij sí' ca'anj quinaraan rá ga Dioso nanj ei. Inanj danj ca'mii Dioso, cataj Dioso: “Dan me se ca'maan raj, ne guun ya raj daj quiran' nij so', ne yo'o cataj 'unj se vaa daj chihaa mǐj se quinaránj rá nij so' ga 'unj a mei”, taj Dioso a. Ne dan me se gaa naá gaa quisǐj qui'yaj Dioso chumij nihánj, ne navij suun rihaan Dioso, ne ca'ne' rá Dioso a.

⁴Ne vaa nana no rihaan danj Dioso nana taj xna'anj che'é güii chij, ne taj nana yo': “Ne güii chij quinaránj rá Dioso che'é yan quisǐj qui'yaj suun Dioso nu' suun qui'yaj suun so' a”, taj nana yo' a. ⁵Ne vaa nana taj uún, ne: “Daj chihaa mǐj se quinaránj ya rá nij so' ga 'unj a man chuguanj”, taj uún Dioso a.

⁶Dan me se ataa ta'aj nij yuvij catuu quinaraan rá ga Dioso adonj. Tzaj ne xa' nij sí' aj cuno se-nana Dioso gaa naá ne ne ca'vej rá nij so' cuno nij so' me se daj chihaa mǐj se quinaránj rá nij so' ga Dioso ma'. Dan me se yo' me quiran' nij so' che'é se ne ca'vej rá nij so' cuno nij so' nana sa' adonj. ⁷Che'é dan cachrón uún Dioso yo'ó güii canoco' yuvij man so', ne cuano nihánj me güii cachrón Dioso canoco' yuvij man so' ei. Ne ma'an sí' cu'naj David ca'mii se-nana Dioso nana yo' nana aj cachrón 'unj rihaan yanj

nihánj, cataj so': “Yaj ro', sese ya catúj se-nana Dioso xréé soj, ne se naqui'yaj nichraj soj nimán soj ma'”, taj sí' cu'naj David yo' a.

⁸Ne che'é se ne quinaraan rá nij sí' cumán gaa naá, qui'yaj sí' cu'naj Josué ro', che'é dan me cachén ndo'o güii, gaa ne ca'mii sí' cu'naj David che'é yo'ó güii canoco' yuvij man Dioso, ne quinaraan rá nij yuvij ga Dioso adonj. ⁹Dan me se ne'en ní' se vaa ya uxrá vaa güii quinaraan rá ní' sij noco' man Dioso adonj. ¹⁰O se nij sí' naránj rá ga Dioso me se aj quisǐj qui'yaj suun nij so', ne navij suun rihaan nij so' ei. Ase vaa qui'yaj Dioso gaa navij se-suun Dioso rihaan Dioso ro', danj 'yaj nij so' chuguanj. ¹¹Che'é se nano' ní' daj qui'yaj ní' quinaraan rá ní' ga Dioso, gaa ne se guun tumé a 'ó tuvi' ní' cacun' tumé nij sí' cumán gaa naá ma'. Dan me se ve'é cuno taran' ní' rihaan Dioso adonj.

¹²O se vaa i'na' ya se-nana Dioso adonj. Ne nucuaj uxrá yo', ne ase vaa yo'o neé espadá sihaa nu' niha rihaan ro', vaa yo', tzaj ne nuveé inanj cúu do', nee do', me se a'ne' yo' ma'. 'O se a'ne' yo' ndaa nimán ya ní', ne che'é se-nana Dioso yo' ro', uun nucuaj Dioso xcaj Dioso cuentá daj vaa nimán ya ní' chuguanj. ¹³Ne nu' nij rasuun vaa yuve ro', ruvi' nu' nij yo' rihaan Dioso chuguanj. 'O se ranga' uxrá rihaan Dioso ei. Ne ruvi' nu' rasuun ni'yaj so', ne ya ruvi' sa' nu' rasuun ni'yaj Dioso ei. Ne veé rihaan ma'an ya Dioso ro', me ca'anj ní' nago' ní' cuentá adonj.

Nana nihánj taj xna'anj se vaa ase
vaa xrej atá suun nocoo doj ro',
danj vaa Jesucristó rihaan ní a

¹⁴Tzaj ne vaa 'o xrej sa' xrej
atá suun nocoo doj nicaj yu'unj
man ní' adonj. Ne sij cavii xta'
doj rihaan rej xta' me so', ne
Jesucristó ta'níi Diose ya me uún
so' nanj chuguanj. Che'é dan nicaj
raan ní' tucuáan nocoo ní' ei. ¹⁵'O
se nuveé xrej ne ne'en daj vaa
sayuun ran' ní' me so' ma'. 'O se
aj ne'en so' daj vaa chrej chil'ii 'na'
rihaan ní' adonj. Che'é dan cunuu
'ee rá so' man ní' gaa ninaj ní'
rihaan sayuun adonj. Dan me se
ase vaa ma'an ní' ro', vaa so', ne ase
vaa sayuun 'na' rihaan ní' ro', danj
vaa sayuun ca'na' rihaan so', tzaj ne
ne qui'yaj so' a 'ó xco' cacun' ma'.
¹⁶Che'é se xrej me so' che'é ní' ro',
che'é dan se cuchu'vi' ní' a doj mei.
Tananj quinichrun' ní' rihaan chrej
sa', gaa ne ca'vee cunuu 'ee rá
Diose man ní', ne asa' 'na' sayuun
rihaan ní', ne ca'vee cata' tu'va
ní' man so', ne nacaj so' man ní'
rihaan sayuun chuguanj. Dan me
se ya cunuu 'ee rá Diose man ní', ne
sese vaa güii quiran' ní' sayuun, ne
qui'yaj so' se luj che'é ní' adonj.

5 'O se xa' nij xrej atá suun
nocoo doj xrej une' yuvii,
tzaj ne atá nij so' suun se vaa racuíj
nij so' man yuvii me rá cunuu sa'
rihaan Diose ei. Dan me se racuíj
nij so' man nij yuvii rque yuvii
xcuu cacaa rihaan Diose che'é
cacun' tumé nij yuvii a. ²Danj 'yaj
nij so', che'é se nanj yuvii me nij
so', ne che'é dan ne uun nucaj
nij so' qui'yaj nij so' inanj se sa' a

man adonj. Che'é dan ca'vee guun
'ee rá nij so' ni'yaj nij so' man nij síi
ne ne'en do', man nij síi vaj chrej
chil'ii do' a. Ne che'é cacun' tumé
ma'an nij so' ro', ³che'é dan ase
vaa uta' nij so' xcuu cacaa rihaan
Diose che'é cacun' tumé yuvii ro',
inanj danj no xcúun nij so' cuta' nij
so' xcuu cacaa rihaan Diose che'é
cacun' tumé ma'an nij so' uún adonj.

⁴Ne taj síi une' man ma'an cata'
suun nocoo yo' ma'. 'O se inanj
síi nacúun Diose me síi cata' suun
nocoo adonj. Danj quiran' síi
cu'naj Aarón síi cane gaa naá, ne
nacúun Diose man so' cata' so' suun
nocoo yo' gaa naá ei. ⁵Ne ase vaa
quiran' síi cu'naj Aarón ro', danj
quiran' Jesucristó chuguanj. Ne
cune' so' man ma'an so' se vaa
cavii sa' so' guun so' xrej atá suun
nocoo doj ma'. 'O se Diose cune'
man so', cataj Diose: "Ta'nij mé
so' á. Cuanó nihánj me se quene'en
yuvii se vaa ta'nij mé so', qui'yaj
nanj á", taj doj nana no rihaan danj
Diose nana ca'mii Diose rihaan
Jesucristó a. ⁶Ne vaa yo'ó nana uún
nana ca'mii Diose rihaan Jesucristó,
ne nana yo' taj se vaa: "Xrej mé so'
nu' cavii nu' ca'anj a. Dan me se
ase vaa xrej cu'naj Melquisedec xrej
cane gaa naá ro', danj vaa ma'an
so' nanj á", taj doj nana no rihaan
danj Diose nana ca'mii Diose rihaan
Jesucristó a. ⁷Dan me se gaa chéé
Jesucristó rihaan chumii nihánj, ne
cachín ni'yaj uxrá so' rihaan Diose
se vaa tinanii Diose man so' se cavi'
so', ne che'é dan ndaa ta'vee ma'an
so', ne che'é se sij aráj cochroj
ya rihaan Diose me so', che'é dan
cuno ya Diose ca'mii so', ⁸ne ta'nij

ya Diose me so', tzaj ne taj se qui'yá' quinanií so' rihaan sayuun a ma'. Che'é sayuun quiran' so' ro', che'é dan tananj a nari' sa' so' cunō so' adonj. ⁹Dan me se guun so' sí uno nu' se-nana rej, ne che'é dan guun so' sí tinanii man taran' ní' sij uno rihaan so' rihaan sayuun, ne dan me se cavii sa' ní' nu' cavii nu' ca'anj, qui'yaj so' ei. ¹⁰Ne guun uún so' xrej ata suun nocōo doj, qui'yaj Diose, ne ase vaa xrej cu'naj Melquisedec vaa uún so' nanj adonj.

Nana nihánj taj xna'anj se vaa no xcúún ní' xcaj ní' cuentá sa' doj che'é se-nana Jesucristó a

¹¹Vaa uxrá yo'ó nana me rá 'unj cataj xna'anj 'unj rihaan soj che'é sí cu'naj Melquisedec yo', ne sayuun uxrá vaa cataj xna'anj 'unj nana yo' rihaan soj, che'é se nuveé sij niha' rá cunō ra'yanj me soj mei. ¹²Dan me se guun que'ee yo' noco' soj man Jesucristó, ne no xcúún soj tucu'yón soj se-nana Jesucristó rihaan tuvi' soj, tzaj ne ne guun nucuaj soj qui'yaj soj danj man asan. 'O se achiin 'o sí tucu'yón asij tacóo se-nana Diose man soj, rá soj, ne che'é dan ase vaa ne'ej vaa soj, ne ne'ej me se ne ne'en ne'ej chá ne'ej se chá ma'. Tihaj utzii ne'ej nanj adonj. Ne ta'nga' danj vaa soj, ne tihaj ndaa tacóo se-nana Diose guun nucuaj soj cunō soj, rá soj nanj adonj. ¹³Dan me se sí utzii too ro', ase vaa ne'ej uun vaa so', ne ataa nari' so' daj qui'yaj so' ne cunū sa' so' rihaan Diose ei. ¹⁴Ne ase vaa sí nocōo sí chá nu' rasuun sca' ro', danj vaa sí acaj ndo'o cuentá, ne tucu'yón niganj

so' nuchruj raa so' che'é rasuun, ne che'é dan ne'en so' nuchruj raa so' me se me se sa' do', me se me se nij do', ne xcaj so' cuentá che'é nu' rasuun yo' chuguanj.

6 Che'é dan se guun rá ní' tucu'yón uún ní' nana aj nari' ní' gaa guun che'e ní' canoco' ní' man Jesucristó mei. Tzaj ne yo'ō tananj guun rá ní' nari' ní' nana chij doj nana cachijn rihaan ní' canoco' sa' ní' man Jesucristó ei. Dan me se aj nari' ní' nana se vaa canicaj nimán ní' tanáj ní' tucuáán chi'ii canoco' ní' asij rque á. Ne aj nari' ní' nana se vaa cuchuman rá ní' ni'yaj ní' man Diose ei. ²Ne aj nari' ní' nana se vaa cata' ne ní' á. Ne aj nari' ní' nana se vaa cuta' ní' ra'a ní' raa tinúú ní' gaa nago' ní' suun man tinúú ní' á. Ne aj nari' ní' nana se vaa cunū i'na' uún nij sí cavi' á. Ne aj nari' ní' nana se vaa ca'ne' Diose cacun' che'é yuvií daj quiran' yuvií nu' cavii nu' ca'anj á. ³Dan me se quisij tucu'yón ní' nana nihánj, ne cachén ní' tucu'yón ní' nana nocōo doj, sese ca'vej rá Diose qui'yaj ní' danj á.

⁴O se sese aj xcaj ní' cuentá che'é se-nana Diose do', sese aj nicaj ní' nu' nij se sa' rque Diose rihaan ní' do', sese aj cayáán Nimán Diose ga ní' do', ⁵sese aj nari' ní' se vaa taj se-nana Diose che'é ní' do', sese aj ne'en ní' suun sa' qui'yaj suun Diose naqui'yaj sa' Diose chumií nihánj do', ⁶gaa ne sese cunū inō nimán ní' ne tanáj rma'an ní' se-tucuanj Jesucristó, gaa ne daj chihāa mίj se guun nucuaj ní' canicaj uún nimán ní' canoco' uún ní' chrej sa' a man chuguanj. Maan se sí 'yaj

danj ro', me rá so' cavi' uún ta'níí Diose rihaan rcutze che'é so', ne me rá so' ca'nga' nacoó yuvií ni'yaj yuvií man Jesucristó che'é so', rá so' adonj. Dan me se nu' yo' me rá ní' quiran' uún Jesucristó, sese guun rá ní' canicaj uún nimán ní' canoco' uún ní' man so' adonj.

⁷O se ase vaa yo'óo vaa ní' rihaan Diose, ne sese aman' uxrá maan rihaan yo'óo, ne sese sa' uxrá avii naa do', cuê do', rihaan yo'óo yo' chá nij síí qui'yaj suun yo'óo yo', ne cavii sa' uxrá yo'óo yo', qui'yaj Diose ei. ⁸Tzaj ne sese quixra' uxrá coj tanj uun do', tanj ya'aa uun do', rihaan yo'óo yo', ne quiran' uxrá yo'óo yo' sayuun, qui'yaj Diose, ne cacaa nu' yo'óo yo', qui'yaj Diose nanj ei.

⁹Ee rá 'unj man soj, tinuj, nocoj. Ne nda' se nana nucaj ca'mii 'unj rihaan soj nihánj, tzaj ne guun ya rá 'unj se vaa sa' uxrá qui'yaj soj, ne ya cavii sa' soj, qui'yaj Diose ei. ¹⁰O se nuveé sij chi'ii me Diose ma'. Sij vaa nica rá me Diose, ne yo'o cunuú rá Diose taran' nij suun sa' qui'yaj suun soj gaa canoco' soj man so' ei. Ne yo'o cunuú rá Diose se vaa aran' uxrá rá soj cunó soj nana a'mii Diose nanj chuguanj. Dan me se qui'yaj suun uxrá soj racuáj soj man nij síí sa' noco' man Diose gaa rque, ne 'o danj qui'yaj ya soj ei. ¹¹Tzaj ne me uxrá rá 'unj se vaa 'o yaan guun ya rá taran' nij tinuj soj se vaa cavii sa' ya uxrá soj qui'yaj Jesucristó, ne guun niha' rá soj canoco' raan soj man so' ndaa se quisij güii ca'na' uún so' ei. ¹²Ne se gaa rmií soj ma'. Maan se ve'é xcacaj soj cuentá daj 'yaj nij síí chumán

sa' rá ni'yaj man Diose, ne ase vaa 'yaj nij so' ro', danj qui'yaj uún soj, gaa ne ca'vee chuguanj. Dan me se nij síí chumán sa' rá me se ne a'ne' rá nij so' ma'. 'O se yo'o noco' nij so' man Jesucristó, gaa ne vaa güii nacaj nij so' nu' se sa' cataj xna'anj Diose se vaa rque Diose man ní' sij noco' man Diose adonj.

Nana nihánj taj xna'anj daj qui'yaj Diose gaa cataj xna'anj Diose rihaan síí cu'naj Abraham daj qui'yaj Diose che'é so' a

¹³Dan me se quisij cataj xna'anj Diose rihaan síí cu'naj Abraham daj qui'yaj Diose che'é so', gaa ne guun rá Diose cuta' Diose raa yo'o síí sa' ndo'o, ne cuchuman rá síí cu'naj Abraham se vaa ya vaa nana cataj xna'anj Diose rihaan so' a. Tzaj ne ne nano' Diose yo'ó so' ma'. Maan se ma'an Diose cataj se vaa ya danj qui'yaj Diose adonj. ¹⁴Dan me se cataj Diose rihaan síí cu'naj Abraham a:

—Ya uxrá cavii sa' so', qui'yaj, ne ya uxrá xna'anj ndo'o nij ta'níí ta'nij si'no so', qui'yaj nanj á —taj Diose rihaan síí cu'naj Abraham a.

¹⁵Ne ya danj quiran' síí cu'naj Abraham, gaa inaj nimán so', yo'o noco' so' man Diose, ne cavii sa' uxrá ya so', ndaa vaa cataj xna'anj Diose rihaan so' nanj ei. ¹⁶Dan me se tananj nij yuvií, ne sese guun rá yo'o so' cano' tuvi' so' che'é 'o nana, ne cuta' so' raa 'o rasuun ca'mii so', gaa ne cuchuman rá tuvi' so', qui'yaj so' chuguanj. Tzaj ne inanj raa yo'o rasuun sa' doj rihaan ma'an yuvií uta' yuvií adonj. ¹⁷Ne gaa ca'mii Diose ga nij síí nacaj

nu' se sa' rque so', ne guun rá so' cuchuman sa' doj rá nij so' che'é nana ca'mii so', ne che'é dan cuta' ma'an ya Diose raa yo'o rasuun, ca'mii Diose a. ¹⁸Dan me se asino ca'mii ya Diose, gaa ne cuta' Diose raa ma'an so' a. Dan me se quisj vij nana ca'mii so', ne daj chihaa mij se natuná Diose se-nana so' ma'. 'O se ne uun nucuaj Diose a'mii Diose nana ne ma'. Che'é dan me ndo'o rá ní' racuj Diose man ní', ne che'é dan vaa che'é ndo'o cuchuman rá ní', ne guun ya rá ní' se vaa ya cavii sa' ní', ndaa vaa cataj xna'anj Diose rihaan ní' nanj adonj. ¹⁹Ne sese yo'o guun ya rá ní', ne gaa sca' nimán ní', ne se chucu'vi' nimán ní' ma'. 'O se ya uxrá vaa nana amán rá ní', ne che'é nana yo' ca'vee quinán ní' rihaan ma'an Diose adonj. ²⁰Dan me se aj taj yaan Jesucristó rihaan ní' quinán' so' rihaan Diose qui'yaj suun so' che'é ní', ne so' me sí guun xrej atá suun nocoo doj, ne ase vaa sí cu'naj Melquisedec gaa naá ro', danj gaa guee so' nu' cavii nu' ca'anj adonj.

Nana nihánj taj xna'anj se vaa ase vaa xrej cu'naj Melquisedec vaa Jesucristó, ne xrej sa' uxrá me Jesucristó che'é ní' a

7 Dan me se xa' xrej cu'naj Melquisedec, tzaj ne sí nicaj suun rey guun chij rihaan chuman' cu'naj Salem me so', ne xrej me uún so' rihaan Diose sí nicun' xtá' adonj. Gaa nanicaj sí cu'naj Abraham 'na' nique so' gaa quisj qui'yaj canaán so' man yo'ó nij sí nicaj suun rey sí cunu'

ga so', ne dan me se ca'anj caran' sí cu'naj Melquisedec man so' chrej 'na' nique so', ne ve'é cataj sí cu'naj Melquisedec se vaa me rá so' qui'yaj Diose se luj che'é sí cu'naj Abraham yo' a. ²Gaa ne xa' nij rasuun qui'yaj canaán Abraham ro', rque so' 'o rasuun rihaan daj a chi' rasuun rihaan Melquisedec, ne diezmo cu'naj yo' a. Ne se-chuvii sí cu'naj Melquisedec taj se vaa sí nicaj suun rey sí 'yaj inanj se sa' me ma'an so' a. Ne sí nicaj suun rey ne chuman' Salem me uún so', ne nana Salem taj se vaa sí nicaj suun rey qui'yaj cumán dínj yuvii me so', taj nana yo' a. ³Ne xa' so', tzaj ne taj rej so' taj nii so' taj tuvi' so' taj ma'. Ne taj güii ca'ngaa so', ne taj güii cavi' so' do' a ma'. Dan me se ase vaa ma'an ta'ní Diose vaa so', gaa guun so', ne xrej guun so' nu' cavii nu' ca'anj nanj adonj. ⁴Dan me se xa' sí cu'naj Abraham, tzaj ne xij taran' ní' sij israelitá me so', ne rque so' diezmo rihaan sí cu'naj Melquisedec che'é nij rasuun qui'yaj canaán ma'an so' adonj. Che'é dan me xcaj soj cuentá daj sij me sí cu'naj Melquisedec yo', se vaa sij sa' uxrá me so' nanj ei. ⁵Dan me se xa' nij ta'ní ta'nij si'no sí cu'naj Leví, tzaj ne cune' Diose man nij so' guun nij so' xrej che'é nij yuvii israelitá ei. Ne a'néj nij so' diezmo man nij sí israelitá, ndaa vaa taj se-tucuanj Moisés yo' adonj. Ne ase vaa tinúu' nij yuvii israelitá vaa nij so', che'é se ta'ní ta'nij si'no sí cu'naj Abraham me nij so' ga yo'ó nij yuvii israelitá adonj. ⁶Tzaj ne nuve' tuvi' nij so' me sí cu'naj Melquisedec ma'. Tzaj ne so'

me síi ca'néj diezmo man síi cu'naj Abraham chuguanj. Ne nda' se sij cavii sa' qui'yaj ma'an Diose me síi cu'naj Abraham, tzaj ne cuno so' se-nana síi cu'naj Melquisedec se vaa qui'yaj Diose se luj che'é so' adonj. ⁷Dan me se ne'en taran' ní' se vaa síi a'mii nana sa' se vaa qui'yaj Diose se luj che'é tuvi' ro', so' me síi ata suun nocoo doj rihaan tuvi' so' síi uno nana sa' yo' adonj. Che'é dan me sij ata suun nocoo doj me síi cu'naj Melquisedec rihaan síi cu'naj Abraham adonj. ⁸Ne xa' nij ta'níi ta'nij si'no síi cu'naj Leví, tzaj ne a'néj nij so' diezmo man yuvii, tzaj ne nanj yuvii me nij so', ne vaa güii cavii' nij so' ei. Ne xa' síi cu'naj Melquisedec, tzaj ne danj Diose taj se vaa yo'o vaa i'na' so' nanj adonj. ⁹Ne nda' se a'néj nij ta'níi ta'nij si'no Leví diezmo man yuvii, tzaj ne vaa che'é cataj ní' se vaa gaa rqué Abraham diezmo rihaan síi cu'naj Melquisedec, gaa ne rqué ma'an nij so' diezmo uún rihaan síi cu'naj Melquisedec adonj. ¹⁰O se nicaj Abraham semilla guun nij ta'níi ta'nij si'no Leví gaa nari' tuvi' so' ga síi cu'naj Melquisedec adonj.

¹¹Dan me se nij ta'níi ta'nij si'no síi cu'naj Leví ro', ta'níi ta'nij si'no síi cu'naj Aarón me nij so', ne tucu'yón nij so' se-tucuanj Moisés rihaan nij yuvii israelitá, tzaj ne ne quisij guun sa' inanj nij yuvii israelitá, qui'yaj nij so' ma'. 'O se danj Diose taj se vaa ase vaa síi cu'naj Melquisedec ro', danj gaa yo'ó xrej cune' Diose, tzaj ne nuveé tuvi' síi cu'naj Aarón me xrej naca yo' a. ¹²Ne che'é se nuu ino doj xrej,

che'é dan nuu ino tucuáan tucu'yón xrej yo' rihaan nij yuvii, ne canoco' nij yuvii yo' yo'ó tucuáan yo' adonj. ¹³Ne danj Diose taj se vaa xrej naca yo' ro', me tuvi' yo'ó x'ne' nij yuvii israelitá, ne taj tuvi' nij so' guun xrej rihaan Diose gaa rque ma'.

¹⁴O se síi 'nij ra'a man ní' ro', so' me yo'o ta'níi ta'nij si'no síi cu'naj Judá, ne ne cataj Moisés se vaa guun ta'níi ta'nij si'no síi cu'naj Judá yo' 'o xrej canicun' rihaan Diose gaa rque ma'. ¹⁵Dan me se ase vaa síi cu'naj Melquisedec vaa yo'ó xrej naca yo' adonj. Ne che'é dan ya uxrá ino doj vaa tucuáan noco' ní', qui'yaj so' adonj. ¹⁶Ne yo'ó xrej naca yo', tzaj ne nuveé che'e se-tucuanj yuvii uun me guun so' xrej ma'. 'O se ase vaa ma'an yuvii vaa tucuáan noco' ma'an yuvii, ne che'é dan vaa güii quinavij tucuáan noco' nij yuvii nanj chuguanj. Tzaj ne xa' xrej naca yo', tzaj ne guun nucuaj so' gaa i'na' so' nu' cavii nu' ca'anj, ne daj chihaa mij se navij xrej yo' man adonj. ¹⁷O se danj Diose taj: "Xrej mé so' nu' cavii nu' ca'anj a. Dan me se ase vaa xrej cu'naj Melquisedec xrej cane gaa naá ro', danj vaa ma'an so' á", taj danj Diose a.

¹⁸Dan me se taj se uun tucuáan nga yo' a ma'. Ne ne guun nucuaj yo' racuíj yo' man yuvii a man chuguanj. Che'é dan quinavij tucuáan nga yo', qui'yaj Diose nanj adonj. ¹⁹O se taj vaj a doj rasuun cunuu sa' qui'yaj se-tucuanj Moisés ma'. Dan me se navij tucuáan nga, ne yo'ó tucuáan sa' naca noco' ní' cuano, ne guun ya rá ní' se vaa cavii sa' ní', qui'yaj

tucuáán nacá yo' adonj. 'O se che'é tucuáán nacá yo' qui'yaj ca'vee cuchí' ma'an ní' rihaan Diose adonj.

20-21 Ne xá' nij ta'níi ta'nij si'no síi cu'naj Leví, tzaj ne taj raá a 'ló rasuun cuta' Diose gaa cune' Diose man nij so' a ma'. Tzaj ne xá' Jesucristó me se vaa se cuta' Diose raá gaa cune' Diose man so' adonj. Dan me se danj Diose taj: "Cuta' síi 'nij ra'a man ní' raá ma'an so', ne daj chihaa míj se nanicaj se-nana so', qui'yaj so' ma'. Dan me se cataj so' se vaa xrej guún so' nu' cavii nu' ca'anj a", taj danj Diose a. Ne che'é se cuta' Diose raá ma'an so' ro', 22 che'é dan ne'en ya ní' se vaa sa' doj vaa tucuáán nocó' ní' sese sij nocó' man Jesucristó me ní', ne sa' doj qui'yaj Diose che'é ní' adonj. 23 Ne nij ta'níi ta'nij si'no síi cu'naj Leví ro', yuvii cavi' vaa güiii me nij so', ne che'é dan a 'ló nij so' se cayáán guun xrej nu' cavii nu' ca'anj ma'. Che'é dan aj cayáán que'ee nij so' a. 24 Tzaj ne Jesucristó me se daj chihaa míj se cavi' so' ma'. Che'é dan orún' so' me xrej qui'yaj suun rihaan Diose che'é ní' nu' cavii nu' ca'anj adonj. Se gaa yo'ó xrej rihaan so' ma'. 25 Dan me se yo'ó vaa i'na' so', ne cachinj ni'yaj so' rihaan Diose che'é ní' nu' cavii nu' ca'anj ei. Che'é dan nu' ní' sij cuchí' rihaan Diose che'é so' me se guun nucaj so' tinanii so' man ní' rihaan sayuun nu' cavii nu' ca'anj adonj.

26 Dan me se vaa che'é ndo'o guun so' xrej atá suun nocoo doj che'é ní' adonj. 'O se síi guee ya me so', ne taj vaj a doj cacun' tumé so' ma'. 'O se síi sa' inanj nimán me so', ne

gan' uxrá yáán so' ga ní' sij tumé cacun' nanj adonj. Dan me se xta' doj yáán so' rihaan nu' rej xta' ei.

27 Ne nij xrej atá suun nocoo doj man rihaan chumii nihánj ro', 'o 'o güiii nó xcuún nij so' caxrii ya'an nij so' xcuu rihaan Diose che'é cacun' tumé ma'an nij so' asino yaan, gaa ne caxrii ya'an uún nij so' xcuu rihaan Diose che'é cacun' tumé nij yuvii nanj chuguanj. Tzaj ne Jesucristó me se ne nó xcuún so' qui'yaj so' danj ma'. 'O se xá' so', tzaj ne ca'néé nimán ma'an so' cavi' so' che'é cacun' tumé ní' nanj adonj. Taj che'é cavi' uún so' che'é ní' ma'. 28 Ne se-tucuaj Moisés taj se vaa cune' yuvii man nanj yuvii cayáán nij yuvii xrej, ne che'é dan nanj síi tumé cacun' me nij xrej yo' nanj adonj. Tzaj ne quinavij tucuáán nga yo', gaa ne cuta' Diose raá ma'an Diose, ne cune' Diose man ta'níi Diose, ne síi sa' inanj me so' nu' cavii nu' ca'anj nanj adonj.

Nana nihánj taj xna'anj se vaa sa' doj vaa se-tucuaj Jesucristó rihaan se-tucuaj Moisés a

8 Dan me se nihánj me nana nocoo doj rihaan taran' nij nana cataj xna'anj 'unj rihaan soj nihánj, ne nana nihánj taj se vaa sa' inanj vaa Jesucristó síi guun xrej atá suun nocoo doj xrej 'yaj suun rihaan Diose che'é ní' ei. Ne rej xta' yáán so' rej nuva' Diose, 2 ne 'yaj suun so' rihaan Diose rá ve' ne rej xta', ne nuveé 'o ve' cune' yuvii uun me ve' yo' ma'. 'O se ve' cune' ma'an síi 'nij ra'a man ní' me ve' yo' adonj. 3 'O se nij xrej atá suun nocoo doj man rihaan chumii

nihánj ro', nō xcuún nij so' rque
 nij so' rasuun do', xcuu cacaa do',
 rihaan Diose adonj. Che'é dan me
 nij so' xrej ei. Che'é dan nō xcuún
 Jesucristó rque uún so' yo'ō rasuun
 rihaan Diose ei. ⁴Dan me se nuveé
 xrej man rihaan chumiī nihánj me
 Jesucristó ma'. 'O se sese sij man
 rihaan chumiī nihánj me Jesucristó,
 ne taj che'é guun so' xrej ma'.
 Maan se rihaan chumiī nihánj
 man xrej rque rasuun rihaan Diose
 ndaa vaa taj Moisés nanj ei. ⁵Ne
 nij xrej man rihaan chumiī nihánj
 ro', ne 'yaj suun nij so' ga ma'an
 nij rasuun man rej xta' ma'. Maan
 se ase vaa se tinanga' uun do', ase
 vaa se-cachun' nij rasuun man rej
 xta' do', vaa suun 'yaj suun nij so'
 nanj adonj. Che'é dan me asij ca'ne'
 Diose suun rihaan síí cu'naj Moisés
 cune' so' ve' mantá xij ve' na'vij
 nij yuviī israelitá rihaan Diose, ne
 nago' so' chrej rihaan Moisés daj
 qui'yaj so', cataj so':

—Xcaj so' cuentá se vaa ase vaa ve'
 tihaán 'unj rihaan so' raá quij ro',
 danj gaa guee ve' cune' so' á —taj
 Diose rihaan Moisés a.

⁶Tzaj ne cuano ro', sa' doj vaa
 tucuáán nocō' ní' gaa 'yaj suun
 ní' rihaan Diose a. 'O se sa' uxrá
 doj vaa síí tucu'yón rihaan ní' daj
 qui'yaj ní' ne cavii sa' ní' rihaan
 Diose, ne gaa cune' Diose man so',
 ne cataj xna'anj Diose rihaan ní'
 se vaa sa' doj qui'yaj Diose ga ní'
 rihaan nij síí cumán gaa naá a. ⁷'O
 se sese inanj sa' uxrá vaa nana cataj
 xna'anj Diose rihaan Moisés, ne taj
 che'é cataj xna'anj Diose yo'ó nana
 che'é ní' ma'. Tzaj ne cataj Diose se
 vaa ca'miī Diose yo'ó nana ei. ⁸Dan

me se cuta' Diose cacun' xráá nij síí
 man gaa naá, cataj Diose se vaa vaa
 yo'ó nana cachiin uún rihaan nij so',
 cataj Diose:

—Ni'yaj so' 'na' güii, —taj síí 'nij
 ra'a man ní'— ne cataj xna'anj
 naca 'unj rihaan nij ta'níí ta'nij
 si'no síí cu'naj Israel do', rihaan nij
 ta'níí ta'nij si'no síí cu'naj Judá do',
 daj qui'yaj nij so', ne cavii sa' nij
 so' rihanj á. ⁹Ne ino doj gaa nana
 naca yo' ga nana cataj xna'anj 'unj
 rihaan xij nij so' sij cumán gaa
 naá, gaa quita'aa 'unj ra'a nij so',
 ne quirii 'unj man nij so' Egiptó a.
 Tzaj ne tanáj xco nij so' nana yo',
 gaa ne na'néj ra'a nij so' nanj adonj
 —taj síí 'nij ra'a man ní' a—. ¹⁰Dan
 me se ino doj gaa nana naca yo'
 nana tucu'yónj rihaan nij ta'níí
 ta'nij si'no síí cu'naj Israel asa'
 quisíj güii yo' adonj —taj síí 'nij
 ra'a man ní' a—. 'O se ca'nej 'unj
 se-nanaj nimán nij so', ne quene'en
 ma'an nij so' daj me rá 'unj qui'yaj
 nij so' adonj. Ne guún 'unj Diose
 canoco' nij so', ne guun nij so' yuviī
 cutumé 'unj adonj. ¹¹Ne se tucu'yón
 nij so' rihaan tuvi' nij so' do',
 rihaan tinúú nij so' do', daj qui'yaj
 nij so' canoco' nij so' manj a ma'. Se
 cataj nij so': “Xcaj so' cuentá che'é
 Diose vij”, se cataj nij so' ma'. 'O
 se quene'en cunudanj nij so' manj
 nanj adonj. Dan me se quene'en
 síí cunij do', quene'en síí chij doj
 do', manj nanj adonj. Quene'en
 cunudanj nij so' manj, ¹²che'é se
 cunuū 'ee raj man nij so', ne se
 qui'yáj sayuun man nij so' che'é
 cacun' tumé nij so' a ma'. Quinavij
 cacun' taj xráá nij so', qui'yáj nanj
 adonj —taj Diose a.

¹³Veé danj ca'mii Diose che'é nana naca yo', ne che'é dan ne'en ní' se vaa guun nga nana cataj xna'anj so' rihaan sí' cu'naj Moisés, ne che'é dan taj se uun se-nana Moisés yo' a ma'. Nichrun' navij nana nga yo' nanj adonj.

Nana nihánj taj xna'anj se vaa ase vaa cunuu sa' nee man nij yuvij israelitá rihaan Diose qui'yaj ton man xcuu ro', danj vaa cunuu sa' nimán ní' rihaan Diose, qui'yaj ton man Jesucristó a

9 Dan me se gaa ca'mii Diose rihaan Moisés asino yaan, ne cataj xna'anj Diose daj qui'yaj nij yuvij israelitá gaa na'víj nij so' rihaan Diose, ne cataj xna'anj Diose daj gaa ve' guee cune' nij yuvij israelitá rihaan chumií nihánj a. ²Dan me se cune' nij yuvij israelitá ve' ne rihaan tuvi' ve', ne rá ve' yo' ro', nuú aga' taj aga' ya'an do', chruun mesá cuta' nii rachrúun rihaan Diose do', ne ve' cu'naj rej guee me ve' yo' a. ³Ne vaa yo' o yatzíj cortiná canoco' rej xco' rej guee yo', ne rej xco' yatzíj cortiná yo' ne yo'ó ve' cu'naj rej guee doj a. ⁴Ne rá ve' rej guee doj yo' nicun' aga' oró míí, ne aga' cacaa squíí rihaan Diose me aga' oró míí tu'vee ndo' o yo' a. Ne vaa se-chrunj Diose chrúun guee, ne chrúun qui'yaj síí cu'naj Moisés gaa ca'mii Diose se-nana Diose rihaan so' me yo' a. Ne nu' xráá chrúun yo' nó aga' oró míí a. Ne rque chrúun yo' ro', nuú xruj oró, ne rque xruj oró cunuú se chá cu'naj maná a. Ne x'núú xruj oró yo' ro', naj xrúun síí cu'naj Aarón chruun vará, ne chruun xra'

ma'an coj rihaan me yo', ne x'núú chruun vará yo' ro', naj yahij no se-nana Diose nana guun rá Diose cunó nij síí israelitá a. ⁵Ne xráá chrúun guee yo' ro', táá vij aga', ne ase vaa se-mozó Diose ro', danj vaa curuvi' roj aga' yo', ne querubines cu'naj roj aga' yo' a. Dan me se táá roj aga' yo' che'é Diose, ne caráán xcóo roj yo' man chrúun guee yo', ne rej xráá chrúun guee yo' ro', me rej tinavij Diose cacun' che'é yuvij a. Tzaj ne se nataj doj che'é rasuun yo' cuano a mei.

⁶Dan me se nu' nij rasuun yo' mán rque roj ve' yo' a. Ne daj a güüi atúj nij xrej rá ve' rej guee yo', 'yaj suun nij xrej rihaan Diose che'é nij yuvij a. ⁷Tzaj ne rque 'ó ve' rej guee doj yo' ro', orún' güüi rque 'o' yo' atúj xrej ata suun nocoo doj rá ve' yo' nanj adonj. Ne dan me se rej guee doj yo' me se inanj ton nicaj xrej atúj xrej rej yo' adonj. Ne ton yo' me se yo' me ton che'é cacun' tumé ma'an xrej do', che'é cacun' qui'yaj nij yuvij gaa ne xcaj nij yuvij cuentá se vaa cacun' me se vaa qui'yaj nij so' do' adonj.

⁸Inanj danj vaa tucuáán tihaañ Nimán Diose a. Dan me se yo' o ne ve' cu'naj rej guee yo', ne che'é dan ne nó xcúun yuvij catuu yuvij rej guee doj yo' ma'. ⁹Ne ase vaa rej guee ro', vaa yo' yaj adonj. Dan me se se cunuu sa' inanj yuvij rihaan Diose qui'yaj rej guee yo' ma'. Ne yo' yaj me se rqué yuvij rasuun do', xcuu cacaa do', rihaan Diose, tzaj ne taj se qui'yá' cunuu sa' inanj nimán yuvij rihaan Diose qui'yaj rasuun yo' a ma'. ¹⁰Mañ se ase vaa tucuáán nocoo' yuvij che'é se

chá yuvii do', che'é se 'o yuvii do', che'é daj 'yaj yuvii na'ya' yuvii do', vaa tucuáán che'é rasuun rque yuvii rihaan Diose nanj á. Dan me se tucuáán noco' yuvii man yaj me tucuáán yo', ne taj xna'anj nana yo' rihaan yuvii daj qui'yaj yuvii ne cunu sa' nee man yuvii rihaan Diose adonj. Tzaj ne asa' quisij nari' yuvii tucuáán naca cuchruj Diose, gaa ne ino uxrá qui'yaj nij yuvii canoco' nij yuvii Diose ei.

¹¹Dan me se guun Jesucristó xrej atá suun noco'oj, ne cavii sa' uxrá ní', qui'yaj so', ne 'yaj suun so' yo'ó rej guee, tzaj ne nuveé ve' cune' yuvii rihaan chumij nihánj me yo'ó rej guee yo' ma'. ¹²Ne orún' uun catúj so' rá rej guee yo', ne yuun che'e navij cacun' tumé ní' nu' cavii nu' ca'anj, qui'yaj so' nanj adonj. Tzaj ne nuveé nanj ton man tana do', ton man scúj le'ej do', me nicaj so' ma'. Maan se ton man ma'an ya so' nicaj so' gaa catúj so' rihaan Diose, ne qui'yaj canaán ya so' nanj adonj. ¹³Dan me se sese ton man tana do', ton man scúj toró do', yaj man nij scúj vacá cacaa do', taman' xrej man nij yuvii, ne cunu sa' nee man nij yuvii yo' rihaan Diose, ¹⁴gaa ne táa a ton man Jesucristó, ne sa' doj vaa yo' rihaan nu' nij rasuun yo' nanj chuguanj. Dan me se taj a doj cacun' tumé Jesucristó ma'. 'O se cayáán Nimán Diose ga so', ne che'é dan rque so' man ma'an so' rihaan Diose chuguanj. Che'é dan me doj a cunu sa' nimán ní', qui'yaj ton man Jesucristó, ne quinavij cacun' tumé ní' che'é se chi'ii qui'yaj ní' asij rque doj a. 'O se daj chihaa mij

se cavii sa' ní', qui'yaj ma'an ní' ma'. Maan se cavii uun ní', qui'yaj ma'an ní' nanj ei. Tananj uún, ne taj che'é qui'yaj ní' se vaa 'yaj ní' nu' 'na' mei. Maan se yaj ro', qui'yaj ní' nu' rasuun rej rihaan ní', ne canoco' inanj ní' man Diose síi vaa i'na' yaj ei.

¹⁵Dan me se Jesucristó me se cavii so' che'é rej quene'en so' se vaa ne guun nucuaj yuvii canoco' nij yuvii nu' tucuáán cataj xna'anj Diose asino yaan rihaan síi cu'naj Moisés chuguanj. Che'é dan Jesucristó me síi narqué tucuáán naca che'é ní', cataj xna'anj so' nana naca rihaan ní' daj qui'yaj ní', cavii sa' ní' rihaan Diose a. Che'é dan ní' sij canacúún Diose man ro', nacaj ní' nu' se sa' cataj xna'anj Diose se vaa rque so' rihaan ní' nu' cavii nu' ca'anj ei. ¹⁶Dan me se sese vaa si'yaj yo'ó so' rasuun guun si'yaj yo'ó yuvii, ne asa' cavii so', ne asino yaan cavii so', gaa ne guun ya rá yuvii se vaa cavii so', gaa ne ca'vee guun rasuun yo' si'yaj yo'ó yuvii yo' adonj. ¹⁷'O se asa' quisij cavii yo'ó so', gaa ne quisij ya nu' se-nana so' che'é si'yaj so' ei. Tzaj ne se guun quita'aa yuvii si'yaj yo'ó so' sese ataa cavii so' mei. ¹⁸Che'é dan gaa cataj xna'anj Diose asino yaan rihaan síi cu'naj Moisés daj qui'yaj nij yuvii israelitá cavii sa' nij so' rihaan Diose, ne vaa xcuu cavii che'é nana yo' nana cataj xna'anj Diose, ne dan me se che'é ton cayanj man xcuu yo' ro', che'é dan quisij ya nu' se-nana Diose che'é nij yuvii yo' adonj. ¹⁹Dan me se gaa quisij cataj xna'anj síi cu'naj Moisés rihaan nij yuvii nu' nana me rá

Diose cunō nij yuvii, gaa ne nicaj so' ton man scúj le'ej nicaj so' na nicaj so' cachij matzinj cachij maree nicaj so' coj cu'naj hisopo nicaj so', gaa ne taman' so' ton yo' rihaan yanj no se-nana Diose do', rihaan taran' nij yuvii do' adonj. ²⁰Ne cataj xna'anj so' rihaan nij yuvii a:

—Che'é ton nihánj quisij ya nu' nij nana cataj xna'anj Diose rihaan ní' daj qui'yaj ní' cavi sa' ní' rihaan Diose adonj —taj Moisés rihaan nij yuvii a.

²¹Gaa ne taman' uún so' ton yo' rihaan ve' mantá guee do', rihaan nu' nij rasuun rásuun nij xrej gaa na'vij nij xrej rihaan Diose do' a. ²²Dan me se inanj ton me se vaa achiin che'é rej nahuun sa' que'ee uxrá rasuun rihaan Diose, taj se-tucuanj Moisés a. Ne sese nuvi' ton, ne se caráj x'naa Diose ni'yaj Diose cacun' tumé yuvii ma'.

²³Dan me se xa' nij rasuun taman' Moisés ton rihaan, tzaj ne ase vaa nij rasuun man rej xta' rej nicun' Diose vaa nij rasuun yo', ne achiin ton che'é rej cunu sa' nij rasuun yo' rihaan Diose, ne che'é dan avi' xcuu, 'yaj Moisés chuguanj. Tzaj ne sa' uxrá doj vaa ma'an nij rasuun man rej xta' rihaan nij rasuun man rihaan chumii nihánj, ne che'é dan achiin se sa' doj rihaan ton man xcuu yan cunu sa' nij rasuun man rej xta' rej catuu ní' rihaan Diose ei.

²⁴Dan me se ma'an Jesucristó me síi rqué ton man ma'an so', che'é rej cunu sa' nij rasuun man rej xta' che'é ní' ei. 'O se nuveé rej guee nuu rá ve' cune' ma'an yuvii me rej catúj Jesucristó ma'. 'O se rej guee man rihaan chumii nihánj

ro', ase vaa rej nicun' ma'an Diose rej xta' vaa yo', tzaj ne nuveé ya ya rej nicun' Diose me yo' ma'. Tzaj ne yaj me se catúj ma'an Jesucristó rej xta' yo', ne cuano nicun' so' rihaan ma'an Diose, ne achín ni'yaj so' rihaan Diose che'é ní' adonj.

²⁵Tzaj ne se qui'yaj so' ndaa vaa 'yaj nij xrej ata suun nocoo doj man rihaan chumii nihánj ma'. Nij xrej me se nicaj nij xrej ton man xcuu atúj nij xrej rá rej guee doj yo' daj a yo' adonj. Tzaj ne ne cachiiin niganj rque Jesucristó ton man ma'an so' rihaan Diose man adonj. ²⁶'O se sese vaa che'é qui'yaj so' danj, ne no xcúun so' que'ee ndo'o quiran' so' sayuun asij gaa qui'yaj Diose chumii nihánj ndaa cuano adonj. Tzaj ne yaj ro', nichrun' quinavij chumii nihánj, ne ndaa yaj ca'na' Jesucristó rihaan chumii nihánj, ne orún' uuun cavi' so' che'é ní', ne navij nu' cacun' tumé ní' nanj adonj.

²⁷Dan me se ne'en ní' daj quiran' 'o 'o ní' sij man rihaan chumii nihánj, ne dan me se ne'en ní' se vaa orún' uuun cavi' 'o 'o ní', gaa ne canicun' ní' rihaan Diose, ne ca'ne' so' cacun' che'é ní' nanj adonj. ²⁸Ne dan me se che'é se orún' uuun cavi' Jesucristó, ne tinavij so' cacun' tumé que'ee yuvii ro', vaa güii ca'na' uún so' rihaan chumii nihánj ei. Tzaj ne nuveé che'e rej cavi' uún so' che'é cacun' tumé yuvii me ca'na' so' ma'. 'O se ca'na' so', ne ní' sij na'vij ndo'o man so' ro', cavi sa' ní' rihaan Diose, qui'yaj so' adonj.

10 'O se ase vaa nij se sa' quene'en ní' rej xraj vaa se-tucuanj Moisés, tzaj ne nuveé

ma'an nij se sa' yo' me tucuáan yo' ma'. 'O se ticavi' nii man xcuu, ne rqué nii xcuu yo' rihaan Diose, ne inanjan danj 'yaj nii 'o yo' 'o yo' nanj adonj. Dan me se taj güii yo'o cunuü sa' ya nij sí rqué rasuun yo' rihaan Diose ma'. ²Dan me se x'néj cacun' xráá nij sí rqué xcuu rihaan Diose, tzaj ne quene'en uún nij so' se vaa vaa doj cacun' tumé uún nij so', ne che'é dan se ca'ne' rá nij so' ga suun rqué xcuu cavi' rihaan Diose a ma'. ³Dan me se che'é xcuu cavi' rqué nij so' rihaan Diose ro', che'é dan 'o yo' 'o yo' me se ne quini'yón nij so' se vaa sij tumé ya cacun' me nij so' a man adonj. ⁴'O se taj se qui'yá' quinavij cacun' tumé yuvij qui'yaj ton man scúj toró do', ton man tana do' a ma'. ⁵Che'é dan ca'na' Jesucristó rihaan chumij nihánj, ne ca'mii so' rihaan Diose, cataj so':

—Taj se uun xcuu rqué nij yuvij cavi' rihaan so' a ma'. Taj se uun nu' nij rasuun rqué yuvij rihaan so' a ma'. Tzaj ne nee manj ro', vaa se uun rihaan so', ne che'é dan qui'yáa so' nee manj adonj. ⁶Dan me se ne niha' rá so' ni'yaj so' xcuu acaa che'é cacun' ma'. ⁷Dan me se cataj 'unj: “Veé 'unj nicun' rihaan so' 'na'. Rihaan dáan so' yanj libró nó nana a'mii che'é 'unj, se vaa qui'yáa 'unj nu' se vaa me rá so' qui'yáj, Ataj”, taj 'unj rihaan so' a —taj nana ca'mii Jesucristó rihaan Diose nana no rihaan danj Diose a.

⁸Dan me se cataj so' se vaa xcuu rqué yuvij rihaan Diose do', 'núu rqué yuvij rihaan Diose do', xcuu acaa do', xcuu avi' che'é cacun' do', ne achiin rihaan Diose ma'. Ne ne

niha' rá Diose ni'yaj Diose rasuun yo' a man adonj. Ne nanj rasuun yo' me se rqué nij sí noco' se-tucuanj Moisés rihaan Diose nanj adonj.

⁹Gaa ne cataj uún so' a:

—Veé 'unj nicun' rihaan so', 'na' qui'yáa 'unj nu' se vaa me rá so' qui'yáj á —taj uún so' a.

Veé dan me tinavij so' tucuáan nga yo', ne vaa tucuáan naca cuchruj so' canoco' ní' a. ¹⁰Ne che'é se yuun che'e nago' Jesucristó man ma'an so' rihaan Diose ndaa vaa guun rá Diose qui'yaj so' ro', che'é dan aj cunuü sa' ní' rihaan Diose adonj.

¹¹Ne xa' taran' nij xrej, tzaj ne yo'o nicun' nij so' 'yaj suun nij so' rihaan Diose daj a güii, ne nanj xcuu do', 'núu do', rqué nij so' rihaan Diose, tzaj ne taj se qui'yá' x'nee cacun' xráá yuvij qui'yaj rasuun yo' ma'. ¹²Tzaj ne Jesucristó me se orún' uun ca'vej so' cavi' so' che'é nij yuvij, ne yuun cavi' so' che'é nu' cacun' ata' nij yuvij nanj adonj. Dan me se rqué ma'an so' man so' rihaan Diose che'é nu' cacun' tumé yuvij, gaa ne ca'anj çayáan so' x'núu Diose rej nuva' Diose ei. ¹³Ne cuano nihánj me se na'vij uun Jesucristó ndaa se qui'yaj canaan Diose rihaan taran' nij sí taj ri'yunj man Jesucristó, gaa ne quirii ta'nga' Jesucristó rihaan taran' nij so' adonj. ¹⁴'O se orún' uun nago' so' man ma'an so' rihaan Diose, ne che'é dan yo'o cunuü sa' nij sí sa' noco' man Diose nu' cavii nu' ca'anj ei. ¹⁵Ne ma'an Nimán Diose taj xna'anj uún rihaan ní' daj quiran' ní' ei. Asino yaan cataj so':

¹⁶—Dan me se ino' doj gaa nana naca yo' nana tucu'yón 'unj rihaan

nij so' asa' quisíj güii yo' adonj. 'O se ca'nej 'un̄j xrej 'un̄j nimán nij so', ne cachron 'un̄j letrá nana yo' cúu raá nij so' daj qui'yaj nij so', ne quene'en ma'an nij so' qui'yaj nij so' rasuun sa' adonj —taj síi 'nij ra'a man ní' a.

¹⁷Gaa ne cataj uún so':

—Ne güej nu' cacun' tumé nij so' xráá nij so', qui'yáj á —taj uún Nimán Diose a.

¹⁸Ne che'é se aj caráj x'naa Diose che'é cacun' tumé ní' ro', che'é dan ca'ne' rá ní' ga suun rque rasuun rihaan Diose che'é cacun' nanj adonj.

**Nana nihánj taj xna'anj se
vaa no xcuún ní' canoco'
raan ní' man Diose a**

¹⁹Dan me se che'é se cayanj ton man Jesucristó ro', che'é dan taj che'é cuchu'vi' ní' catuu ní' rá rej guee xtá' a ma'. Dan me se taj che'é cuchu'vi' ní' canicun' ní' rihaan ma'an Diose, man tinuj, man nocoj. ²⁰O se cavi' nee man Jesucristó, ne inanj danj ca'núj so' chrej naca rihaan ní' catuu ní' rihaan Diose, ne gaa i'na' ní' rihaan Diose nanj adonj. ²¹Ne xrej sa' uxrá me uún Jesucristó che'é ní' sij noco' man Diose nanj ei. ²²Che'é dan no xcuún ní' cuchí' ní' rihaan Diose, ne che'é se amán rá ní' ni'yaj ní' man Jesucristó, che'é dan guun ya uxrá rá ní' se vaa ca'vee canoco' sa' ní' man Diose, ne 'o cuyaan gaa rá taran' ní' ei. Dan me se 'o cuyaan gaa rá taran' ní', che'é yan quisíj nanó rá ní' che'é cacun' tumé ní', ne cunuu sa' ya nimán ní', qui'yaj ní', gaa canoco' ní' man Jesucristó

nanj chuguanj. Ne cata' ne ní' rque na sa', ne cunuu sa' ya nee man ní' nanj adonj.

²³Ne yo'o cuchuman rá ní' se vaa ya cavií sa' ní', ne se guun vij rá ní' daj chihaa mjí mei. 'O se vaa che'é gaa nucuaj rá ní' man síi cataj se vaa sa' qui'yaj so' che'é ní' á. ²⁴Ne xcaj ní' cuentá che'é tinúu ní' daj qui'yaj ní' ne sa' doj cunuu 'ee rá nij tinúu ní' man tuvi' so', ne doj a qui'yaj suun nij tinúu ní' suun sa' che'é Diose a. ²⁵Ne se tanáj ní' tucuáan nuu chre' ní' ga tinúu ní' ma'. 'O se vaa yuvií ne noco' tucuáan yo', tzaj ne no xcuún soj nago' soj chrej nucuaj man tinúu soj gaa nuu chre' soj ei. Ne yaj ro', me se doj a cunuu chre' soj, che'é yan ne'en soj se vaa nichrun' quisíj güii ca'na' uún Jesucristó rihaan chumii nihánj nanj adonj.

²⁶O se sese aj canoco' ní' nana ya nana nari' ní', gaa ne sese quirii nimán ní' qui'yaj ní' cacun', ne taj vaj yo'ó se vaa qui'yaj ní' gaa ne caraá x'naa Diose uún che'é cacun' tumé ní' a ma'. ²⁷Dan me se nique ní', ne vaa güii ca'ne' Diose cacun' che'é ní', ne gaa yo'o ya'an, ne guun niha' uxrá rá ya'an yo' chá ya'an yo' man nij síi taj ri'yunj man Diose nanj adonj. ²⁸Xa' nij síi noco' se-tucuanj Moisés, tzaj ne sese 'yaj 'o tuvi' nij so' cacun', ne sese vaa vij va'núj síi quene'en se vaa 'yaj so' cacun', ne se cunuu 'ee rá nii man so' a ma'. Maan se avi' so' cuaj, 'yaj nii nanj á. ²⁹Ne nij uxrá doj gaa sayuun quiran' síi taj ri'yunj man ma'an ta'níi Diose adonj. 'O se ton man Jesucristó ro', qui'yaj cunuu sa' ní' rihaan Diose ne yo'o canoco' ní'

chrej sa' cuchruj Diose che'é ní' ei. Tzaj ne taj yu'vee nó ton yo', rá nij síí tanáj xco se-nana Jesucristó a ma'. Ne quij a'mii nij so' rihaan Nimán Diose síí qui'yaj ndo'o se luj che'é ní' ei. ³⁰O se aj ne'en ní' daj ca'mii Diose, cataj Diose:

—'Unj me síí no xcúun qui'yaj sayuun man yuvii tumé cacun' a. Ya naru'vee 'unj nu' che'é se vaa qui'yaj nij so' rihaan chumii nanj á —taj Diose a.

Ne taj uún Diose:

—'Unj sij 'nij ra'a man soj ro', ca'nej cacun' che'é soj sij noco' manj adonj —taj uún Diose a.

³¹Dan me se cuchu'vi' ndo'o vaa me se vaa quiran' nij síí tanáj ra'a Diose vaa i'na' ya adonj.

³²Dan me se cunuú rá soj daj qui'yaj soj gaa guun che'e soj canoco' soj man Jesucristó ei. Dan me se gaa guun che'e soj canoco' soj man Jesucristó, ne síí xcaj cuentá me soj, ne guun nucuaj soj quiran' soj sayuun, ne yo'o raan canoco' soj man Jesucristó chuguanj. ³³Ne quene'en yuvii daj sij me soj, ne nachri' nij yuvii ni'yaj nij yuvii man soj, ne qui'yaj nij yuvii sayuun man soj, ne guun tuvi' soj ga yo'ó nij síí ran' sayuun yo' a. ³⁴O se cunuu 'ee rá soj man tinúú soj nij síí 'nij taga', ne guun niha' rá soj ni'yaj soj se vaa ca'néj yuvii si'yaj soj che'é se sij noco' man Jesucristó me soj a. 'O se ne'en soj se vaa sa' doj vaa si'yaj soj rasuun nicaj soj rej xta', ne rasuun yo' me se daj chihaa míj se quinavij rasuun yo' a man adonj. ³⁵Dan me se se gaa cuchu'vi' soj canoco' soj man Jesucristó, ne se

ca'ne' rá soj ma'. Ne 'o veé danj gaa rá soj nu' cavii nu' ca'anj ei. Che'é yan a'néé nucuaj nimán soj ro', vaa güii, ne noco'o ya vaa rasuun quiri' soj ei. ³⁶O se vaa che'é gaa inaj nimán soj, ne yo'o qui'yaj soj se vaa me rá Diose qui'yaj soj, ne vaa güii nacaj soj nu' se vaa cataj Diose nacaj soj chuguanj.

³⁷Dan me se danj Diose taj se vaa nichrun' ca'na' síí ca'na', ne se guun raan so' ma'. ³⁸Ne síí sa' rihaan Diose ro', maan che'é se amán rá so' ro', che'é dan yo'o cayáan so' ga Diose adonj. Tzaj ne sese canicaj so' rej xco so', ne se gaa niha' rá Diose quene'en Diose man so' a ma', taj danj Diose a.

³⁹Tzaj ne nuveé sij anicaj rma'an rej xco me ní' ma'. Che'é dan se quiri' ní' ma'. 'O se sij nucuaj rá man Diose me ní', ne che'é dan quinani' nimán ní' rihaan sayuun adonj.

Nana nihánj taj xna'anj daj 'yaj síí amán rá ni'yaj man Diose a

11 Vaa se ne ruvi' ni'yaj yuvii, tzaj ne guun ya rá ní' se vaa ya vaa nu' nij rasuun yo' ei. Tzaj ne grún' ní' sij amán rá ni'yaj man Diose me nij síí amán rá se vaa ya vaa nu' nij rasuun yo' chuguanj. ²Ne nij síí man gaa naá ro', amán rá nij so' ni'yaj nij so' Diose, ne che'é dan gaa naá cataj Diose se vaa síí sa' me nij so' ei.

³Xa' ma'an ní', tzaj ne che'é se amán rá ní' ni'yaj ní' Diose ro', che'é dan xcaj ní' cuentá se vaa ca'mii Diose, gaa ne guun nu' nij chumii, qui'yaj so' adonj. Dan me se nicaj Diose rasuun ne ruvi', ne

qui'yaj Diosē nū' rasuun ruvi' ni'yaj ní' adonj.

⁴Xa' síi cu'naj Abel, tzaj ne che'é se cuchumán rá so' ni'yaj so' Diosē ro', che'é dan sa' doj vaa se rquē so' rihaan Diosē, ne tinúu so' Caín me se nij doj vaa rasuun rquē so' man Diosē adonj. Che'é dan cataj Diosē se vaa sa' vaa nimán síi cu'naj Abel, ni'yaj Diosē che'é nij rasuun rquē síi cu'naj Abel rihaan Diosē a. Dan me se che'é se cuchumán rá so' ni'yaj so' Diosē ro', che'é dan yaj taj xna'anj yuvií che'é so' daj qui'yaj so' gaa naá nanj adonj.

⁵Xa' síi cu'naj Enoc, tzaj ne che'é se cuchumán ndo'o rá so' ni'yaj so' Diosē ro', che'é dan vaa i'na' so' cavii so' ca'anj so' rej xtá' rej yanj Diosē, ne ne ca'vej rá Diosē cavi' so' ma'. Dan me se nano' ndo'o nii man so', tzaj ne ne nari' nii man so' a ma'. Maan se naxcaj nū' Diosē man so' ca'anj so' rej xtá' nanj adonj. 'O se gaa ataa cavií so' rej xtá', ne cataj xna'anj Diosē che'é so' se vaa guun niha' uxrá rá Diosē ni'yaj Diosē man so', che'é se síi sa' guun so' rihaan Diosē ei. ⁶Tzaj ne síi ne amán rá ni'yaj man Diosē ro', daj chihaa mój se guun niha' rá Diosē ni'yaj Diosē man so' a ma'. 'O se síi me rá cuchi' rihaan Diosē ro', nō xcúun so' cuchuman rá so' se vaa ya vaa Diosē, ne vaa che'é cuchuman rá so' se vaa naru'vee ma'an Diosē rihaan nij síi nano' ya man Diosē ei.

⁷Dan me se síi cu'naj Noé, tzaj ne che'é se cuchumán ndo'o rá so' ni'yaj so' Diosē ro', che'é dan, nda' se ataa quene'en so' daj gaa sayuun qui'yaj Diosē man chumií nihánj,

tzaj ne maan che'é se ve'é cuno so' nana cataj xna'anj Diosē rihaan so', ne che'é dan qui'yaj so' rihoo xij chéé rihaan na, ne che'é dan me quinanii nij tuvi' nij so' rihaan sayuun yo' adonj. Ne maan che'é se cuchumán ya rá so' ni'yaj so' Diosē, che'é dan cuta' so' cacun' ya xráa nij yuvií man rihaan chumií se vaa ne ca'vej rá nij yuvií cuno nij yuvií se-nana Diosē, ne guun ma'an so' síi sa' ni'yaj Diosē adonj.

⁸Dan me se síi cu'naj Abraham uún me se che'é se cuchumán ndo'o rá so' ni'yaj so' Diosē ro', che'é dan cuno so' rihaan Diosē gaa canacúun Diosē man so', ne cavii so' ca'anj so' rej rquē Diosē yo'óo guun to'oj so' vaa güii a. Dan me se a doj ne quene'en so' me rej cuchi' so', tzaj ne ne guun vij rá so' ma'. Maan se cavii so' ca'anj so' adonj. ⁹Dan me se maan che'é se cuchumán rá so' ni'yaj so' Diosē ro', che'é dan cavii so' chiháan so' ca'anj so' rej cataj xna'anj Diosē se vaa guun to'oj so' ei. Ne gaa cuchi' so' yo'óo yo', ne to'oj yo'ó yuvií me yo'óo yo', tzaj ne veé danj quináj síi cu'naj Abraham yo', ne cuta' so' ve' mantá, ne yáan so' ga ta'níi so' síi cu'naj Isaac do', ta'nij si'no so' síi cu'naj Jacob do' a. Taran' nij so' me síi guun to'oj yo', cataj Diosē rihaan síi cu'naj Abraham a. ¹⁰Danj qui'yaj síi cu'naj Abraham, cuno so' rihaan Diosē, che'é se sij na'vij ndo'o cayáan yo'óo chuman' nocoo chuman' naj rej xtá' me so' a. Ne nuveé ve' mantá uun me chuman' yo' ma'. 'O se raan ndo'o vaa tacóo nū' ve' naj chuman' yo' ei. 'O se ma'an Diosē cuchruj chuman' yo',

ne ma'an Diose qui'yaj nu' chuman' yo' adonj.

¹¹Dan me se che'é se cuchumán rá síí cu'naj Abraham ni'yaj so' Diose ro', che'é dan nda' se chana ituun me nica so' chana cu'naj Sará, ne nda' se chii nga me ma'an so', tzaj ne guun nucuaj rá so' man Diose se vaa ca'ngaa ta'níí so', che'é se cuchumán rá so' se vaa Diose me síí qui'yaj nu' se vaa cataj xna'anj ma'an Diose rihaan so' adonj. ¹²Dan me se nda' se daj doj cavi' síí chii nga yo', tzaj ne xna'anj ndo'o nij so', ne ase vaa que'ee ndo'o nij yati' man rej xta' ro', danj vaa guun que'ee uxrá nij tuvi' nij so' nij síí israelitá yo', ne dan me se ase vaa naj yo'óo chruu tu'va na ya'anj ro', cunudanj vaa xna'anj nij so' nanj adonj.

¹³Dan me se yo'o cuchumán rá taran' nij síí man gaa naá ni'yaj nij so' Diose ndaa se cavi' taran' nij so' ei. Ne ne quirí' ma'an nij so' se vaa cataj xna'anj Diose se vaa rque Diose rihaan nij tuvi' nij so' ma'. Tzaj ne quene'en nij so' se vaa vaa güii qui'yaj Diose cunudanj yo', ne che'é dan guun nihá' rá nij so' nanj adonj. Ne cataj xna'anj nij so' se vaa nuveé chihanj nij so' me chumij nihánj ma'. Maan se vaj uun nij so' doj rihaan chumij nihánj, ne síí man yo'ó chumij me nij so', cataj ma'an nij so' nanj adonj. ¹⁴Ne síí a'mii danj me se nata' nij so' se vaa nano' uxrá nij so' yo'ó chumij guun chihanj nij so' ei. ¹⁵Ne sese guun rá nij so' se vaa sij chihanj chumij nihánj me nij so', ne gaa ya'núj rihaan nij so' nanicaj nij so' chiháán nij so' chuman' naj rihaan

chumij nihánj, tzaj ne ne guun rá nij so' danj ma'. ¹⁶O se guun ndo'o rá nij so' cane nij so' chuman' sa' doj chuman' naj rej xta' ei. Ne sese taj vaj chuman' sa' cayáán nij so' vaa güii, ne guun na'aj Diose gaa nanj ei. Tzaj ne taj che'é guun na'aj Diose ma'. 'O ya vaa chuman' noco cayáán nij so', qui'yaj Diose ei.

¹⁷Ne che'é se cuchumán rá síí cu'naj Abraham ni'yaj so' Diose ro', che'é dan gaa guun rá Diose quene'en Diose sese raan ya noco' so' man Diose, ne ca'vej rá síí cu'naj Abraham ticavi' so' rihaan Diose man orún' ta'níí so' Isaac síí rqué ma'an Diose man so' a. Dan me se danj qui'yaj síí cu'naj Abraham yo', che'é se me ndo'o rá so' ni'yaj so' Diose a. Ne Isaac me síí rqué Diose guun ta'nij síí cu'naj Abraham, ndaa vaa cataj xna'anj Diose rihaan so' se vaa gaa ta'níí so' a. ¹⁸Dan me se cataj xna'anj Diose rihaan síí cu'naj Abraham se vaa cumán ndo'o ta'níí ta'nij si'no síí cu'naj Abraham qui'yaj síí cu'naj Isaac yo' a. ¹⁹Ne nda' se guun ndo'o rá síí cu'naj Abraham ca'ngaa ta'níí ta'nij si'no so', tzaj ne ca'vej rá so' ticavi' so' man síí cu'naj Isaac rihaan Diose nanj chuguanj. 'O se guun rá so' se vaa guun nucuaj Diose cunyu i'na' uún yuvií qui'yaj Diose asa' cavi' yuvií, rá so' a. Dan me se ya uxrá, ne daj doj se cavi' síí cu'naj Isaac, qui'yaj Abraham, tzaj ne caráán Diose rihaan so', ne tanáj uún Diose man síí cu'naj Isaac rihaan síí cu'naj Abraham a.

²⁰Dan me se síí cu'naj Isaac me se che'é se cuchumán rá so' ni'yaj so'

Diose ro', che'é dan cataj so' se vaa qui'yaj Diöse se luj che'é roj ta'níí so' síí cu'naj Jacob ga síí cu'naj Esaú a. Ne cataj xna'anj so' daj gaa quiran' roj ta'níí so' rej rihaan roj so' a.

²¹Dan me se síí cu'naj Jacob me se che'é se cuchumán rá so' ni'yaj so' Diöse ro', che'é dan gaa nichrun' cavi' so', ne cataj so' se vaa qui'yaj Diöse se luj che'é roj ta'níí síí cu'naj José, ne dan me se ru'maan so' se-garro'té so' rihaan yo'óó, ne quina'víj ndo'o so' rihaan Diöse a.

²²Ne dan me se síí cu'naj José me se che'é se cuchumán rá so' ni'yaj so' Diöse, che'é dan gaa nichrun' cavi' so', ne nuchruj raa so' daj qui'yaj nij yuvií israelitá ga cúú man so' asa' curihañj nij so' Egiptó vaa güiii, ne che'é dan cataj xna'anj so' se vaa asa' cavii nij síí israelitá rej Egiptó, ne quirii nij so' cúú man ma'an so' nicaj nij so' ca'anj nij so', cataj so' rihaan nij so' a.

²³Dan me se Moisés me se che'é se cuchumán rá nij tuvi' síí cu'naj Moisés ni'yaj nij so' Diöse ro', che'é dan va'núj ya yavii caxrij yuve nij so' man Moisés gaa ca'ngaa so' a. Danj qui'yaj nij so' che'é se quene'en nij so' se vaa ve'é ndo'o vaa ne'ej yo' a. Ne ne cuchu'vi' nij so' rihaan síí nicaj suun rey síí cataj xna'anj se vaa cavi' nu' ta'níí nij so' ne'ej sno'o cunii a ma'.

²⁴Che'é se cuchumán rá ma'an síí cu'naj Moisés ni'yaj so' Diöse ro', che'é dan gaa cachij so', ne ne ca'vej rá so' cataj yuvií se vaa ta'nij si'no síí nicaj suun rey cu'naj Faraón me so' ma'. ²⁵O se ca'née nimán so' quiran' so' sayuun ga nij

yuvií noco' man Diöse nanj adonj. 'O se sa' a doj vaa canocó' man Diöse, rá so', ne nij vaa guun niha' rá' qui'yá' cacun' rihaan Diöse yaj vaa i'na' rihaan chumii nihánj, rá so' a. ²⁶Dan me se vaa yu'vee ndo'o nó sayuun quiran' so' che'é síí ca'nej Diöse tinanii man yuvií man rihaan chumii nihánj rihaan sayuun, ne taj yu'vee nó taran' nij rasuun sa' man rej cu'naj Egiptó, rá so', ne ve'é a doj canocó' man Diöse, rá Moisés a. 'O se aj navij nu' nuchruj raa so' che'é nu' rasuun sa' rque Diöse man so' ei. ²⁷Che'é se cuchumán rá so', che'é dan tanáj so' Egiptó ca'anj so', ne ne cuchu'vi' so' daj qui'yaj síí nicaj suun rey man so' ma'. Nda' se ne ruvi' Diöse ni'yaj yuvií, tzaj ne ase 'yaj síí ruvi' nicun' Diöse rihaan ro', danj qui'yaj síí cu'naj Moisés, yo'o canoco' so' man Diöse adonj. ²⁸Che'é se cuchumán rá so' ni'yaj so' Diöse, che'é dan cuchruj so' cha'anj cu'naj pascuá navij rá nij yuvií israelitá, ne cataj xna'anj so' rihaan nij yuvií israelitá se vaa caxrii nij so' ton matzinj tu'va ta'yaa rihaan tucuá nij so', gaa ne se gaa nanj cavi' ta'níí nij so' síí chava' qui'yaj se-mozó Diöse síí 'yaj avi' ndo'o yuvií, taj Moisés rihaan nij so' a.

²⁹Dan me se nij yuvií israelitá me se che'é se cuchumán rá nij so' ni'yaj nij so' Diöse ro', che'é dan guun nucujaj nij so' cachén nij so' tanuu na ya'anj cu'naj Na Ya'anj Ve'ej a. Ne ca'ne' na ya'anj yo' man yo', ne quináj yo'óó nacoó inanj cachén nij so', qui'yaj Diöse a. Tzaj ne gaa guun rá nij síí man Egiptó cachén nij so' rihaan yo'óó

nacoo yo' me se caráán na xráá nij so', ne canó xráá nij so', qui'yaj na yo' a.

³⁰Ne che'é se cuchumán rá nij yuvií israelitá ni'yaj nij so' Diose ro', che'é dan cachén chij ya güii gaa aman tucuachriin nij so' nu' anicaj chuman' cu'naj Jericó, ne canee nu' chingá nicun' nu' anicaj tu'va chuman' yo', qui'yaj Diose, che'é yan cuchumán rá nij so' ni'yaj nij so' Diose a.

³¹Dan me se che'é se cuchumán rá chana nihá' rá ga chii chana cu'naj Rahab ni'yaj no' Diose ro', che'é dan ne cavi' no' ga yo'ó nij síí man chiháán no' síí ne ca'vej rá cunó rihaan Diose a. Maan se ve'é nacaj no' man roj síí israelitá síí me rá quene'en daj vaa nu' chiháán no', ne ne qui'yaj no' sayuun man roj so' a.

³²Ne me yo'ó nana cataj xna'anj 'unj rihaan nij soj, rá soj ga. 'O se achén ndo'o orá, 'yáá 'unj, ne ataa cataj xna'anj 'unj che'é síí cu'naj Gedeón do', che'é síí cu'naj Barac do', che'é síí cu'naj Sansón do', che'é síí cu'naj Jefte do', che'é síí cu'naj David do', che'é síí cu'naj Samuel do', che'é yo'ó taran' nij síí nata' se-nana Diose gaa naá do', nanj chuguanj. ³³Dan me se che'é se cuchumán rá nij so' ni'yaj nij so' Diose ro', che'é dan qui'yaj canaán nij so' rihaan síí nicaj suun rey do', ca'ne' sa' nij so' cacun' che'é yuvií do', quiri' nij so' se vaa cataj xna'anj Diose quirí' ya nij so' do', guun nucujaj nij so' caráán nij so' tu'va chuvaa do', ³⁴tina'áj nij so' ya'an yuvaa se gaa nanj cacaa nij so' qui'yaj ya'an do', quinanii nij so'

rihaan yuvií nicaj neê espadá me rá ticavi' man nij so' do', nari' nucujaj nij so' qui'yaj Diose gaa ninaj nij so' do', guun nucujaj nij so' qui'yaj canaán nij so' rihaan síí man yo'ó chuman' síí cunu' ga nij so' do' ei. ³⁵Ne vaa nij chana cuchumán rá ni'yaj man Diose se vaa ya cunuú i'na' uún tuvi' nij chana síí cavi', ne ya uxrá cunuú i'na' uún tuvi' nij chana yo' ei.

Ne yo'ó ta'aj nij síí cuchumán rá ni'yaj man Diose ro', quita'aa nii numíj nii man nij so', ne go' uxrá nii man nij so' ndaa se cavi' nij so' ei. Dan me se cavi' nij so' che'é se ne ca'vej rá nij so' cataj nij so' se vaa nij vaa Diose a. 'O se sa' doj cavi' nij so' che'é Diose, ne ve'é doj cunuú i'na' uún nij so' vaa güii qui'yaj Diose, rá nij so' a. ³⁶Ne yo'ó ta'aj nij so' me se ca'nga' nacoo yuvií ni'yaj yuvií man yo'ó ta'aj nij so', ne go' yuvií cuartá xráá nij so', ne yo'ó ta'aj nij so' me se numíj nii aga' ne' ra'a nij so', ne caxríj nii taga' man nij so' chuguanj. ³⁷Yo'ó ta'aj nij so' cavi', qui'yaj yuvií gaa go' nij yuvií yahij man nij so' a. Ne ta'aj nij so' ro', ca'ne' aga' seraa a'ne' chruun man nij so' a. Go' yuvií neê espadá man ta'aj nij so' a. Ne dan me se taran' nij síí sa' yo' me se cachée unj nij so' rej xraj rej rque rihaan chumií nihánj, ne taj vaj ve' sa' cayáán nij so' ma'. Ne inanj nuj matzinj do', nuj tana do', cunuú nij so' ei. Ne síí nique uxrá me nij so', ne síí cachiin ndo'o rasuun rihaan guun uún nij so', ne síí nij uxrá quiran' guun uún nij so', qui'yaj yuvií ei. ³⁸Dan me se sij sa' uxrá me nij so', ne ne nó

xcúun nij yuvii man rihaan chumii nihánj cayáán nij so' ga nij yuvii nihánj a man adonj. Dan me se táá ri'yunj yuvii man nij so' rihaan chumii nihánj, ne dan me se unánj nij so' tucua' nij so', ne vaj nij so' rej tacaan do', rej quij do', atúj nij so' rque yu'uj taj yuvej do', rque yu'uj taj rque yo'óó do', 'yaj nij yuvii yo' nanj adonj.

³⁹Ne dan me se nda' se guun niha' rá Diose ni'yaj Diose man cunudanj nij so' che'é se cuchumán rá nij so' ni'yaj nij so' Diose, tzaj ne ne quiri' nij so' nu' se vaa cataj xna'anj Diose se vaa qui'yaj Diose che'é nij síf noco' man so' ma'. ⁴⁰O se aj ne'en Diose se vaa sa' doj gaa suun qui'yaj suun ní' che'é so', ne che'é dan ne ca'vej rá Diose cunu sa' inanj nij síf cumán gaa naá yo' rihaan Diose, gaa ataa cunu sa' ma'an ní' rihaan so' ma'. 'O se che'é ní' me guun raan qui'yaj Diose nu' se sa' che'é nij síf cumán gaa naá yo' adonj.

Nana nihánj taj xna'anj se vaa se ca'ne' rá ní' ga suun noco' man Diose á

12 Dan me se sa' uxrá vaa nij síf man gaa naá, ne cuano nihánj me se man nij so' nu' anicaj rej x'nuj ní' ni'yaj nij so' man ní' daj 'yaj ma'an ní' adonj. Che'é dan ne daj qui'yaj ní', rá soj ga. Maan se tanáj xco ní' nu' se vaa caráán chrej rihaan ní' qui'yaj suun ní', ne tanáj xco ní' nu' chrej chi'ii ei. 'O se sayuun ndo'o vaa tanáj xco ní' chrej chi'ii yo' adonj. Ne dan me se yo'ó qui'yaj suun ní' nu' suun vaa rihaan ní' ei. Dan me se ase vaa síf unánj tico tuvi' ro', danj gaa

ní', ne se ca'ne' rá ní' ca'anj ní' rej rihaan ní' ma'. ²Tzaj ne yo'ó ni'yaj ní' rej nicun' Jesucristó, ne veé so' me síf cuchruj tucuaán amán rá ni'yaj man Diose ei. Dan me se cuchumán rá ma'an so' ni'yaj so' Diose, ne so' me síf quisj qui'yaj ya nu' suun vaa rihaan so' che'é rej canoco' ní' man so' adonj. Dan me se guun rá Jesucristó se vaa cavii sa' yuvii qui'yaj so', ne quene'en so' se vaa guun niha' rá so' sese cavii sa' nij yuvii, ne che'é dan guun nucuaj so' cavi' so' rihaan rcutze, ne ne xcaj so' cuentá che'é rej ca'nga' nacoó yuvii ni'yaj yuvii man so' ma'. Ne xcaj ní' cuentá se vaa x'núú Diose rej nuva' Diose ro', ne so' cuano, uun chij so' ga Diose chuguanj. ³Che'é dan me nuchruj raa soj se vaa ase vaa taj ri'yunj yuvii tumé cacun' man soj ro', danj táá ri'yunj yuvii tumé cacun' man uún so' chuguanj. Tzaj ne ne ca'ne' rá so' ma'. Tananj soj uún, ne nuchruj raa soj, ne se ninaj nimán soj mei.

⁴Dan me se 'yaj ndo'o nij síf tumé cacun' sayuun man soj, tzaj ne aj ne'enj se vaa na'vej uxrá rá soj qui'yaj soj cacun' ga nij so' ma'. Ne nda' se sayuun 'yaj nij so' man nij soj, tzaj ne ne cavi' nij soj, qui'yaj nij so' mei. ⁵Ne aj ni'yón soj chrej nucuaj no rihaan danj Diose, nanj raj a. Dan me se ase vaa ta'níí Diose vaa soj, taj nana yo' chuguanj. Ne nihánj me se taj nana yo' ei: "Cunó so' ca'mij, ta'nij ne'ej. Se guun nachri' so' chrej sa' rqué síf 'nij ra'a man ní' mán so' ma'. Ne se quiri' rá so' asa' caxríj yuvaá síf 'nij ra'a man ní' mán so' che'é cacun' 'yáá

so' mei. ⁶'O se sí' 'nij ra'a man ní' me se tucu'yón so' man taran' ní' sij 'ee rá so', ne uun yuvaa so' man taran' nij sí' nacaj so' guun ta'nij so', sese qui'yaj nij so' cacun' adonj." Dan me se nu' nana yo' me a'mii danj Diose ei. ⁷Dan me se sese guun nucuaj soj gaa axrij yuvaa Diose man soj, ne cunaj ndo'o vaa yo' ei. Dan me se ase 'yaj nij sí' man nihánj ga ta'ní' so' ro', danj 'yaj Diose ga soj chuguanj. Ne me sij ta'nij me yo'o so' sese ne yuvaa rej so' man so' ne ne narqué rej so' chrej rihaan so' ga. Daj chihaa míj se cavii sa' sí' vaa danj ma'. ⁸'O se cunudanj yuvii yuvaa rej man sese qui'yaj nij so' cacun' ei. Tzaj ne sese ne yuvaa rej ní' Diose man soj, ne nuveé ta'nij Diose me soj gaa a ma'. Dan me se taj vaj rej soj gaa mei.

⁹Dan me se vaa rej ní' sí' ne rihaan chumii nihánj, ne caráj cochroj ní' rihaan nij so' gaa narqué nij so' chrej rihaan ní' daj qui'yaj ní' adonj. Che'é dan táa a doj sese cunq sa' ní' rihaan Diose chuguanj. 'O se rej nimán ya ní' me Diose chuguanj. Dan me se yo'o gaa i'na' nimán ní', qui'yaj so' ei. ¹⁰Dan me se gaa me ní' xni ro', doj güii me yo', ne güii yo' me se tucu'yón rej ní' rihaan ní' daj qui'yaj ní' cavii sa' ní', ne narqué so' chrej man ní' adonj. Dan me se qui'yaj rej ní' ndaa vaa me rá ma'an so' ga ní' ei. Dan me se Diose me se sa' uxrá doj cavii sa' ní', qui'yaj xrej so' chrej sa' chuguanj. Dan me se ase vaa Diose, sa' inanj vaa so' ro', danj gaa sa' inanj ma'an ní', qui'yaj Diose ei. ¹¹Tzaj ne ya uxrá, ne gaa

tihaj narqué nii chrej man ní', ne sayuun uxrá vaa nari' ní' daj qui'yaj ní', ne ne niha' uxrá rá ní' ma'. 'O se nanó rá ní', gaa sayuun vaa yo' adonj. Tzaj ne achén doj, ne nuu sa' nimán ní' 'yaj chrej sa' yo', ne nuu xej nimán ní', 'yaj yo' ei.

¹²Che'é dan ase 'yaj sí' naqui'yaj nica ra'a do', tacóo do', danj qui'yaj soj, naqui'yaj nica soj nimán soj sese vaa vij nimán soj ei. ¹³Ne ase 'yaj sí' naqui'yaj sa' chrej cachee yuvii ro', danj qui'yaj soj, nuchruj raa soj daj qui'yaj nimán soj ei. Asa' quisij qui'yaj soj danj, gaa ne ca'vee se nuveé sij noco' sa' chrej sa' me soj, tzaj ne se tanáj nu' soj chrej sa' ma'. 'O se cunuu sa' soj adonj.

¹⁴Dan me se tirquee soj gaa dínj cayáan soj ga cunudanj yuvii ei. Ne tirquee soj cunuu sa' soj ndaa vaa ma'an Diose ei. 'O se sese taj vaj se sa' yo', ne daj chihaa míj se quene'en ní' man sí' 'nij ra'a man ní' ma'. ¹⁵Ne tumé soj man soj, gaa ne se gaa nanj tanáj yo'o tinúú soj se luj qui'yaj Diose che'é ní' ei. Dan me se se guun nachri' yo'o tinúú soj ni'yaj so' tinúú so' ma'. Tadó uxrá soj che'é se 'o sí' nachri' ni'yaj tinúú ro', qui'yaj quiri' rá que'ee tinúú soj ei. ¹⁶Ne se guun cataj yo'o tinúú soj se vaa taj se uun se-nana Diose mei. 'O se ase vaa sí' cu'naj Esaú sí' cane gaa naá vaa sí' a'mii danj chuguanj. Dan me se sí' chava' me sí' cu'naj Esaú, tzaj ne nu' rasuun sa' tanáj rej so' rihaan so' me se cutu'vej so' nu' rasuun sa' yo' rihaan tinúú so', che'é se guun rá so' rque tinúú so' doj se chá cha so' chuguanj. ¹⁷Ne aj ne'en soj se vaa cachén doj, gaa ne guun rá

uún sí cu'naj Esaú cataj rej so' se vaa nacaj uún so' se sa' yo', tzaj ne quináj uun so' nanj ei. 'O se taj se qui'yá' tucua'anj ni'ya so' nana ca'mii so' a ma'. Nda' se ndaa ta'vee ma'an so' che'é yan guun rá so' quirí' so' se sa' yo', tzaj ne ne quirí' so' daj chihaa míj a ma'.

¹⁸Dan me se tumé uxrá soj man soj ei. 'O se cavii sa' soj doj rihaan nij sí israelitá vaa nanj chuguanj. Nij so' me se cuchí' nij so' tacóo quij xcaan rej rqué Diose se-nana Diose rihaan sí cu'naj Moisés, ne quene'en nij so' caco' ya'an raa quij quene'en nij so' rej rmi' ndo'o quene'en nij so' nana yuvaa quene'en nij so' do' ei. ¹⁹Tananj uún, ne cuno nij so' chruun a'yánj cuno nij so' nana ca'mii ma'an Diose rihaan nij so' do' ei. Dan me se kuchu'vi' uxrá nij so', ne cachíin ni'yaj nij so' rihaan Diose se vaa ne ca'vej rá nij so' ca'mii ma'an Diose se-nana Diose rihaan nij so' a. ²⁰'O se nana sayuun ndo'o me nana cataj xna'anj Diose rihaan nij so', rá nij so', ne dan me se cataj Diose rihaan nij so' se vaa sese ndaa xcuu cachee xráa quij yo', ne go' nij so' yahij man xcuu yo' ndaa se cavi' xcuu cuaj, taj Diose rihaan nij so' a. ²¹Dan me se kuchu'vi' ndo'o nij yuvií ni'yaj nij yuvií quij yo', ne ndaa ma'an sí cu'naj Moisés cataj se vaa kuchu'vi' uxrá so' ne ndaa quirí'fj ma'an man so', taj so' a.

²²Tzaj ne ino uxrá quiran' nij soj ga nij so' nanj ei. Dan me se xa' soj, tzaj ne ca'vee cuchí' ma'an soj chuman' Jerusalén chuman' naj rej xta' nanj chuguanj. Ne chuman' Jerusalén naj rej xta' me se ase

vaa chuman' Jerusalén naj raa quij cu'naj Sion rihaan chumii nihánj ro', vaa chuman' yo' ei. Ne ma'an Diose sí vaa i'na' yáan chuman' Jerusalén naj rej xta' yo', ne yo' me rej man míj míj se-mozó Diose me rej yo', ne navij ndo'o rá nij se-mozó Diose cha'anj che'é Diose rej yo' adonj. ²³Ne dan me se cunuú chre' soj ga taran' nij ta'níí Diose, ne ase vaa sí chava' vaa cunudanj nij ta'níí Diose yo', ne ne nij so' ga ma'an ya Diose rej xta' yo', ne no se-chuvii nij so' rihaan yanj taj rej xta' yo' ei. Ne ca'vee cuchí' soj rihaan ma'an ya Diose sí a'ne' cacun' che'é cunudanj yuvií adonj. Ne ca'vee cuchí' soj rej ne nimán nij sí aj cunuú sa' inanj rihaan Diose ei. ²⁴Ne ca'vee guun tuvi' soj ga Jesucristó, ne so' ro', me sí cuchruj tucuaán naca che'é ní' daj qui'yaj ní' canoco' ní' man Diose ei. Dan me se sa' a doj a'mii ton cayanj man Jesucristó vaa ton cayanj man sí cu'naj Abel qui'yaj tinúú so' sí cu'naj Caín nanj adonj.

²⁵Sa' uxrá ni'yaj soj sese se nachri' soj ni'yaj soj man sí narqué chrej sa' man soj ei. Dan me se ma'an ya Diose me so', ne tadó uxrá soj ei. Dan me se tananj nij sí ne ca'vej rá cuno rihaan sí cataj xna'anj se-nana Diose rihaan nij so' rihaan yo'óo nihánj gaa naá me se ne quinanii nij so' mei. Táa a ní' sij man cuano, ne a'mii sí nicun' rej xta' rihaan ní', ne sese nachri' ní' ni'yaj ní' xrej so' chrej sa', ne daj chihaa míj se quinanii ní' a ma'. ²⁶Dan me se gaa ca'mii Diose gaa naá, ne quinaan ya yo'óo, ne cuano nihánj me se taj xna'anj so' se vaa quinaan

uún yo'óó, qui'yaj so' chuguanj. Tzaj ne nuveé inanjan yo'óó me se quinaan ma'. 'O se yo'óó do', rej xta' do', quinaan, qui'yaj so' adonj. ²⁷Ne che'é se quinaan nu' yo', che'é dan ne'en ní' se vaa quinavij nu' nij rasuun, qui'yaj Diose ei. Ne rasuun qui'yaj Diose ruvi' ni'yaj ní' cuano me se quinaan adonj. Ne nij rasuun ne ruvi' rihaan ní' me se se quinaan rasuun yo' ma'. 'O se gaa rasuun yo' nu' cavii nu' ca'anjan adonj. ²⁸Dan me se guun ní' sij chihanj rej sa' ndo'o rej guun chij ní' ga Diose, ne daj chihaa mij se quinaan chuman' yo' a ma'. Che'é dan guun ni'yaj uxrá ní' rihaan Diose, ne che'é dan yo'o qui'yaj suun ní' rihaan Diose, ne guun niha' rá Diose, qui'yaj ní' ei. Ne caraa cochroj uxrá ní' rihaan Diose nanj á. ²⁹'O se ase vaa 'o ya'an vaa Diose síf nocó' ní', ne cacaa nu' se chi'ii, qui'yaj so' adonj.

Nana nihánj taj xna'anjan daj qui'yaj ní', ne ve'é canoco' ní' man Diose a

13 Yo'o gaa ee rá soj man tinúú soj ei. ²Se tanáj xcó soj suun a'mii sa' ga yuvii 'na' yo'ó chuman' ma'. 'O se cunuú rá soj ndaa vaa qui'yaj síf ca'mii sa' ga yuvii 'na' yo'ó chuman' asij rque ei. Ne ne quene'en nij so' se vaa se-mozó Diose me síf ca'mii ga nij so' ma'. 'O se ndaa síj, gaa ne quene'en nij so' adonj. ³Se ni'yón soj tinúú soj síf 'nij taga' ma'. Dan me se guun rá soj ndaa adi' se ma'an soj 'nij taga' ga tinúú soj a. Ne se ni'yón soj tinúú soj síf ran' sayuun 'yaj yuvii ma'. Dan me se guun rá soj ndaa adi' se ma'an soj 'yaj yuvii sayuun man a. ⁴Ne ve'é

uxrá sese xcaj soj 'o chana adonj. Nuveé se na'aj me yo' ma'. Ne nuveé cacun' me sese otoj soj ga nica ma'an soj ma'. Tzaj ne síf otoj ga yo'ó chana do', síf otoj ga nica tuvi' do', me se qui'yaj Diose sayuun man so' adonj. ⁵Se guun soj síf ee rá ni'yaj sa'anjan ma'. Maan se gaa xej nimán soj che'é doj rasuun man rihaan soj ei. 'O se ma'an Diose cataj xna'anjan rihaan ní', ne: —Daj chihaa mij se tanáj 'unj man soj ma' —taj Diose rihaan ní' a.

⁶Che'é dan vaa che'é ca'mii ní' nana nihánj nana no rihaan danj Diose a: “Che'é se racuj síf 'nij ra'a man ní' manj, che'é dan se cuchu'ví 'unj ma'. 'O se nuveé se ya'anjan tiha' me sayuun qui'yaj yuvii manj ma'”, cataj ní' a.

⁷Nuchruj raa soj daj 'yaj nij síf uun chij rihaan soj, nij síf cataj xna'anjan se-nana Diose rihaan soj á. Xcaj uxrá soj cuentá daj 'yaj nij so' gaa yanjan nij so' rihaan chumii nihánj, ne xcaj uxrá soj cuentá daj gaa quiran' nij so' vaa güii a. Ne ase vaa nucuaj uxrá rá nij so' ni'yaj nij so' Diose ro', danj gaa qui'yaj soj uún, ne gaa nucuaj rá soj ni'yaj soj Diose ei.

⁸Dan me se orún' Jesucristó me síf nicun' asij rque, ne veé so' me síf nicun' cuano, ne veé so' me síf canicun' nu' cavii nu' ca'anjan nanj adonj.

⁹Se ca'vej soj tiha' yu'unjan nii man soj ga yo'ó tucuáan naca mei. 'O se aj sa' uxrá vaa sese nari' nucuaj nimán soj che'é se luj qui'yaj Jesucristó che'é ní' ei. Tzaj ne se nari' nucuaj nimán soj qui'yaj se chá mei. 'O se se cavii sa' nij síf

noco' tucuáán yo' tucuáán che'é se chá ma'. ¹⁰Dan me se ase vaa síí nicun' mesá altar rihaan, ne man rasuun sa' rihaan 'yaj Diose ro', danj vaa ní' chuguanj. Ne orún' ní' me síí no xcúún chá rasuun taj rihaan mesá altar yo' ei. Ne nij síí 'yaj suun che'é tucuáán nga tucuáán noco' nii rá nuvíí noco ro', ne nó xcúún nij so' chá nij so' nij rasuun sa' taj rihaan se-mesa ní' a ma'.

¹¹Dan me se 'anj nicaj xrej ata suun noco doj ton man xcuu rá rej guee doj che'é nij yuvií, ne ton che'é cacun' tumé yuvií me ton yo' a. Ne nu' nee man scúj yo' me se rii nii man nee yo' rej tu'va chuman', ne axríj ya'an nii nu' nee yo' nanj adonj. ¹²Che'é dan danj qui'yaj guee Jesucristó cavi' so' tu'va chuman' rej atúj yuvií chuman', gaa ne cunuu sa' nij yuvií rihaan Diose che'é ton cayanj man ma'an so' nanj adonj.

¹³Che'é dan me cuano nihánj me se no xcúún ní' curihanj ní' ne cuchí' ní' rihaan so' tu'va chuman' a. Dan me se ase qui'yaj so' ca'vej rá so' nachri' yuvií ni'yaj yuvií man so' ro', danj qui'yaj ní' ca'vej rá ní' nachri' yuvií ni'yaj yuvií man ma'an ní' á. ¹⁴Q se rihaan chumij nihánj ro', taj vaj chiháán ní' chuman' quinaj nu' cavii nu' ca'anj mei. 'Q se nano' ní' yo'ó chuman' cane ní' vaa güüi ei.

¹⁵Che'é se vaa qui'yaj Jesucristó ro', che'é dan yo'q cataj ní' rihaan Diose se vaa ve'é uxrá vaa qui'yaj Diose nanj adonj. Ne dan me se nuveé inanj rasuun man rihaan chumij nihánj me se vaa nago' ní' man Diose ma'. 'Q se nana sa' tu'va

ní' me se vaa nago' ní' man so' ei.

¹⁶Ne se tanáj soj suun sa' 'yaj soj, suun racuíj soj man tinúú soj síí nique mei. 'Q se yo'ó se sa' nago' ní' man Diose me uún yo', ne uun niha' rá Diose ni'yaj Diose man síí 'yaj danj adonj.

¹⁷Ve'é cunó soj rihaan nij síí uun chij rihaan soj á. 'Q se síí tumé man nimán soj me nij so', ne vaa güüi xna'anj Diose man nij so' daj qui'yaj nij so' che'é soj adonj. Ne ve'é cunó soj, ne guun niha' rá nij so' cataj xna'anj nij so' che'é soj chuguanj. Ne se rnúj soj rihaan nij síí guun chij mei. 'Q se sese rnuj soj rihaan nij so', ne rnuj nij so' rihaan Diose che'é soj, ne se cavii sa' soj mei.

¹⁸Cachinj ni'yaj soj rihaan Diose che'é núj á. 'Q se guun ya rá núj se vaa taj vaj cacun' tumé núj ma'. 'Q se inanj me rá núj qui'yaj sa' núj gaa yáán núj rihaan chumij nihánj ei. ¹⁹Ne cuano nihánj me se uxrá doj cataj xna'anj 'unj rihaan soj se vaa cachinj ni'yaj soj se vaa ca'vej rá Diose ra'yanj cuchí' uún 'unj rihaan soj ei.

Nihánj me taj síí 'yaj yanj nihánj se vaa ve'é cayáán nij síí nayaá yanj nihánj rá so' a

²⁰Dan me se Diose me síí 'yaj vaa xej nimán ní', ne so' me síí qui'yaj cunuu i'na' uún Jesucristó sij 'nij ra'a man ní' gaa cavi' so' a. Ne Jesucristó me se ase vaa síí tumé matzinj vaa so', ne ase vaa daán so' matzinj vaa ní', ne tumé so' man ní' sij noco' man so', ne síí sa' uxrá me so', ne che'é ton man so' me nicaj ní' yo'ó tucuáán cuchruj so' che'é ní'

se vaa canoco' ní' man Diose a. Ne me rá 'un̄j ²¹guun nucuaj soj qui'yaj suun soj nu' suun sa', ne qui'yaj soj nu' se vaa me rá Diose qui'yaj soj, qui'yaj ma'an Diose chuguanj. Ne dan me se guun ní' se niha' rihaan Diose, qui'yaj ma'an Diose che'é Jesucristó ei. Ne ve'é ndo'o cayáán so' nu' cavii nu' ca'anj adonj. Veé danj gaá ya ei.

²²Cuano nihánj me se cataj xna'anj 'un̄j rihaan soj se vaa ve'é cunō soj nana nihánj, tinuj, nocoj. 'O se chrej nucuaj narqué 'un̄j man soj me nana nihánj, ne doj vaa nana nihánj nana cachrón 'un̄j

rihaan yanj cartá nihánj nayaa soj ei.

²³Xcaj soj cuentá se vaa curihanj tinú' Timoteo taga', ne sese ra'yanj ca'na' so' rihanj, ne cuchí' núj rihaan soj ra'yanj ei.

²⁴Cataj soj rihaan taran' nij síi uun chij rihaan soj do', rihaan taran' nij síi sa' rihaan Diose do', se vaa ve'é cayáán nij so' raj ei. Nij tinúú ní' nij síi man rej cu'naj Italia ro', ve'é cayáán nij soj, rá nij so' chuguanj.

²⁵Me rá 'un̄j qui'yaj ndo'o Diose se luj che'é taran' nij soj nanj adonj. Amén.